

complet

L E S

ENTRETIENS  
DES CHAMPS  
ELIZEES.



M. D C. X X X I.

12  
23

Case

F

39

.326

1631/622

THE NEWBERRY  
LIBRARY

M. D. C. X. X. X.

**M**E han a quitado la honrra, disoit des a Ils  
Espagnols le Marquis Spinola, pres- m'ont  
sé d'angoisses dans les tristes heures de sa osté  
mort; & avec ces piteux accens s'achemi- l'hon-  
noit pour passer dans les champs Elizées, neur.  
quand Caron d'une voix furieuse s'escria;  
*Qu'on me chasse cet Espagnol d'icy, de peur qu'il*  
*ne vienne troubler le repos des bien-heureux, cōme*  
*ceux de sa nation font toute la terre en l'autre mon-*  
*de; & en mesme temps on le saisit au corps*  
pour le jetter hors de la barque. A quoy fai-  
sant resistance, il remonstra qu'il estoit Ita-  
lien: & si fameux, qu'il ne méritoit pas d'es-  
tre traité de la sorte: Ce qu'au lieu d'ap-  
paizer ce farouche vieillard, l'irrita dauanta-  
ge, luy reprochant sa lascheté de parler le  
langage de ceux, qui n'ont autre dessein, que  
d'enchaîsner son pays & le mettre en serui-  
tude: & cependant comme il ioignit la ter-  
re, il se desmesla facilement de ceux qui ne  
luy voulurent faire de violence, pour le res-  
pect de son nom.

Arriuant dans des prairies voisines, les  
premieres personnes de cognoissance qu'il  
apperceut, furent les Ducs de Sauoye, &  
Collalto, qui disputoient ensemble sur la  
prise de Pignerol; l'un soustenuant qu'on le  
pouuoit secourir, & l'autre maintenant le  
contraire: *Je vous accorderay bien*, dit le Mar-  
quis, mettant l'espée à la main pour charger

4

le Duc ; qui se mit en deffence , & commen-  
cerent vne furieuse meslee , sans que Col-  
lalto se mit entre-deux , à cause des coups  
qu'il craignoit naturellement : & si Rada-  
mante ne se fust trouué pres de ce lieu , il y  
auoit apparence d'vn grand desordre : mais  
faisans les hola , il voulut estre informé  
du suiet de leur querelle , fort estonné de  
l'inquietude du Duc , qui ne pouuoit de-  
meurer en repos : & commandant le silen-  
ce aux assistans , accourus en grand nombre ,  
il ordonna aux interessez de faire entendre  
leurs raisons.

Illustrissime Seigneur dit le Marquis , ie  
ne croy pas estre blasmé de ce que i'ay fait ,  
ayant attaqué celuy qui est en partie cause  
de ma mort ; pour ne m'estre pas voulu ,  
dans le secours que ie luy donnois , gouuer-  
ner selon son humeur impetueuse , boüil-  
lante & sans ordre , qui luy a causé & aux  
siens , d'auoir esté souuent despoüillez de  
leurs pays. Je ne faisois pas difficulté de ha-  
zarder ma personne , mais bien mon armée ,  
me confiant plus dans mon art & dans mon  
industrie , qu'à la fortune , ayant tousiours  
naturellement eu plus d'inclination à cher-  
cher vne victoire , qui se peut obtenir sans  
effusion de sang , que de rien commettre au  
hazard : parce que quand on est sur la deffen-  
sive , le prudent Capitaine doit plustost tem-  
poriser & laisser consumer son ennemy dans  
les difficultez de faire la guerre en pays



8  
Estranger, que d'auenturer l'Estat avec chose si inegale, comme le gain d'une bataille, contre vn homme qui n'a rien à perdre que son armée : Et à ce propos sert la responce de ce grand Duc d'Alue, au conseil qu'on luy donnoit de combattre les François qui se retiroient de Naples : Non, non, dit-il, ie ne suis pas resolu de iouer vn Royaume avec vne Casaque de toille d'or : que portoit d'ordinaire le Duc de Guise leur General.

C'est pourquoy, me trouuant des gens belliqueux en teste, commandez par le Cardinal de Richelieu resolu de me combattre, ie fis mon effort pour l'en empescher, ne voulant pas donner à ce ieune Aiglon le moyen d'acquérir de la reputation à nos despens : ce que ie luy fis entendre d'abord, & que ie me tiendrois tousiours enterre dans mes trauaux, parce que *No queria pelear con mi hijo*, qui estoit vne alliance d'amitié, que nous auions eue ensemble de pere & de fils à mon passage de la Rochelle : où comme avec sincerité ie respondis aux questions qu'il me faisoit : & principalement sur le sujet de ce siege, où ie reconnus bien que le Roy s'estoit engagé sur son seul aduis, ie luy dis franchement qu'il auoit pris l'vnique moyen pour paruenir à la fin d'une si grande entreprise qui ne consistoit qu'en ces deux poincts : L'vn que ie voyois qu'il bastissoit toute son esperance par la

pratique qu'il en faisoit à sçauoir ; *Abria la mano*, C'est à dire, despendre largement, *y serrar el puero*. Ce qui fut cause que me voyant parler avec ceste candeur, apres plusieurs autres entretiens, nous contractames vne grande amitié, sans aucunement blesser les interests de nos Maistres, & pour mon-  
 strer qu'il la vouloit continuer, quoy que nous commandassions deux armées contraires, il me renuoya plusieurs paquets qui auoient esté surpris, sans auoir voulu en descacher vn seul; laquelle chose, bien que d'un costé elle pouuoit auoir dessein de nous mettre en ialousie, neantmoins l'effet qui en parut, fut à mon gré si civil, que ie ne me peus tenir de le louer publiquement, qui donna suiet à mon ennemy de se forger cette fantasie, que i'auois quelque Traicté secret qui luy estoit incogneu: que si cela eust esté vray, ie puis dire que le succez m'en eust esté fort heureux, parce qu'il ne tint qu'à moy seul que la paix ne fut faite, toutes sortes de conditions raisonnables m'en ayant esté offertes.

Mais la chose estoit lors bien loin de ma pensée, aussi bien que de celle de Collalto, ayans tous deux mesmes desseins sur differents lieux, luy, celuy de prendre Mantoüe & moy Casal, que i'auois asseuré d'emporter en quarante iours, comme i'eusse fait, sans les accidents qui me suruindrent, qui empescherent que ie ne me peus preua-

loir de l'avantage que me donna le parlement du Cardinal de Richelieu d'Italie, sur les entreprises qu'on faisoit contre luy dans la Cour de France. Et comme sa presence m'obligeoit d'estre tousiours retranché auprès de luy, pour empescher ses progrès, esperant qu'encores que ie ne le peusse quitter pour aller assieger Cazal, ie ne l'airois de l'emporter par la faim, quoy qu'avec vn long temps: Aussi tost que ie l'eus veu partir, & en suite introduire la licence dans les forces qu'il laissoit, ie creus que bien tost elles seroient dissipees, & que partant ie pouuois tout entreprendre. Ce qui me fit resoudre, pour abreger le temps, de faire l'effort necessaire pour nous redre maistres de cette place, qui nous ouuroit le chemin à de plus hautes conquestes. Et comme i'eus commencé, l'enuie m'accueillit de toutes parts. Collalto retirant ses Allemans de mon armée, qui par ce moyen demeura si foible, que ie fus du tout impuissant pour l'exécution de mon dessein: Et le Duc, ayant enuoyé son Abbé Scaglia en Espagne declamer contre moy, obtint, que l'on m'osteroit le pouuoir de plus traiter la paix, pour le donner au Marquis de sainte Croix, petit fils de celuy qui accommoda si bien les François à la Tercere, duquel on fit plus de cas que de mon experience & sincerité: qui me fit concevoir vn tel despit, que quasi sans auoir de sçeuire ie m'en allay à la mort,



ayant mon esprit troublé & remplý de haine contre cette nation qui m'a osté l'honneur.

Ce discours finy, le Duc commença ses plaintes, sur la confiance qu'il auoit prise en ces faſtueuſes inſcriptions de la priſe de Breda, *Quatuor regibus frustra conantibus*: qui le firent reſoudre d'abandonner les François pour penſer par là ſe conſeruer la partie du Montferrat qu'il auoit conquiſe: & dans la perte de Caſal ſe venger du Cardinal de Richelieu, qu'il hayſſoit mortellement, pour auoir porté le Roy à ne vouloir pas approuuer les oppreſſions qu'il faiſoit & ſuſcitoit au Duc de Mantouë: & au lieu de voir ces efforts capables de triompher contre tant de Rois, il veit au contraire ſes pays ſaccagés en ſa preſence, par vn Preſtre, au deuant duquel il ne fit que battre d'vne aiſle, faiſant de ſa crainte, prudence, pour n'oſer iamais affronter vn homme ruiné dans la Court. Dequoy il auoit tres-bonne cognoiſſance, comme ayant intelligence particuliere avec aucuns des principaux qui y trauailloient en France: qui luy faiſoit eſperer, que dans les inquietudes où il pouuoit eſtre, il ne ſeroit pas difficile de le deſaire, ſi on l'eult viuement attaqué. Au lieu dequoy, le temps ſe paſſoit en complimens entr'eux, pendant qu'il demeueroit deſhonoré dans les accuſations publiques qu'on faiſoit cõtre luy, & du peu de confiance qu'on y pouuoit prendre



dire, quoy qu'il n'eust iamais manqué de parole à ceux à qui il auoit dōnee, cōme le Roy Catholique le sçait, le Grand Henry, ceux de Grenoble & de Geneue, & Henry III. mesme ne luy denieroit pas son tesmoignage, si la passion du Marquisat de Saluces ne l'emportoit. Que pour conclusion il voyoit ses pays desolez, traiter la paix sans luy, & en fin abandonnant du tout ses affaires s'en aller assieger Casal, laissant seulement avec luy Dom Philippes Spinola avec cēt ordre, *Denunca iamas pelear con los Franceses.* Ce qui luy donna telle rage, apres la prise de Saluces quasi emportee sur ses yeux, iointes à la perte de Mantoüe, qu'une petite fièvre le saisissant l'emporta en deux fois vingt quatre heures, apres auoir fait esclatter en Espagne la douleur de tous ses compliments rendus à celuy qu'il haysoit, au lieu de l'auoir chassé d'Italie avec son armee, comme il l'auoit esperé.

Le Marquis repliqua tout indigné qu'il s'estonnoit de tels discours, comme si la civilité estoit vn crime entre les gēs de guerre: ce qui n'estoit pas l'opinion de Cyrus & d'Alexandre qui en auoient vsé avec excez enuers leurs ennemis: Et l'acte diuin de Scipion en Espagne en la restitution d'un grand nōbre de Dames d'excellente beauté, qu'il ne voulut pas mesme luy estre amenées de peur (dit vn Romain qu'il ne semblast qu'il eust cueilli au moins des yeux, quelque chose du fruit

de leur virginité, luy auoit acquis autant de gloire que la victoire d'Annibal. Ainsi que c'estoit vne grande iniustice d'accuser des actions, qui auoient esté si dignement pratiquées par ces grands hommes, qu'on pouuoit bien nommer par leurs merites les Dieux de la guerre, lesquelles n'vnissoient pas pourtant leurs interets. Car on ne me scauroit imputer d'auoir fauorisé les armes de Frâce, ny au Cardinal celles d'Espagne; ausquelles il a préparé de longs exercices, qui recompenseront leur vnion en Allemagne, pour troubler les alliez du Roy Tres-Chrestien. Car par ses conseils & sage preuoyance on leur a suscité tant d'ennemis par tout, qu'il faut des siecle pour remedier à tous ces maux. Ne me pouuant assez estonner de la simplicité des Allemands dans leurs secours d'Italie, dont rien ne reuiert à leur profit, qui est tout pour les Espagnols, & le dommage pour eux: car cela obligera tout le monde d'esmouuoir tous les orages qu'on pourra pour porter dans leur pays l'infortune qu'ils veulent causer aux autres. A quoy les François ne sont pas peu considerables, maintenant que le party Huguenot est ruiné, qui estoit la seule & vniue rselle ressource du Comte d'Oliuares; qui se mocqua de moy quand ie luy dis, que s'il laissoit prendre la Rochelle il s'en repentiroit: croyant en son ame, qu'elle estoit imprenable, (comme à la verité à bon droit, elle estoit tenuë pour telle de tous ceux

qui la cognoissoient. Et au lieu d'y apporter de forts obstacles: il s'amusoit à des ruses & traictez secrets, sur lesquels mal à propos il creut plus qu'à mes conseils, ayant pour but ma ruine: Et cette passion le porta des'arrester à des gens qui l'abusoient, faute de sçauoir les affaires qui requeroient en vn tel coup de partie vne bonne resolution, prompte & soudaine, qui fist effect; les finesses n'estans bones qu'aux affaires non pressées, qu'on traicte de loin & avec du loisir: & ne voudrois luy donner sur ce suiet vn meilleur exemple que du mesme Cardinal, à qui il en veut, lequel quand le temps requiert qu'on vze d'adresse, nul hōme du monde ne luy est esgal: Mais quand les choses pressent: il ne conseille pas lors des subtilitez, mais des Armées de trente mille hommes, qui suivent leur Roy en toutes occasions où il faut aller. Et c'est ce qui rend leurs affaires prosperes, & les nostre en mespris; & si on eust esté assez habile & assez diligent de tenir tousiours les François occupez au dedans, nous estiōs libres au dehors; & l'Italie estoit reduite sous le ioug en cette rencontre, où nous eussions sans doute pris Casal comme Mantouë, & assuietty Rome & tout le reste.

Quand à ce que le Duc proteste de sa foy inuiolable, i'admire son assurance, d'aller guer Espagne & France pour marque de sa fermeté, ayant cent fois trompé l'vn & l'autre, comme Geneve, qu'en pleine Paix il



attaqua ; & Grenoble , qu'il asseuroit vouloir secourir contre l'Escliguières , & forcer le Chasteau de Mont-benaud pour leur rendre ; ce qu'il executa avec leurs canons & leurs poudres , & puis le garda pour luy. C'est encores merueilles , que pour marque de sa preud'homie il n'a allegué la Comtesse de Sault , laquelle l'appella en Prouence , & pour recompence , il l'emprisonna , & eust couru fortune de la vie , si , vestuë en Suisse , dont elle auoit la taille , elle n'eust pris la fuite sur vn Cheual d'Espagne.

Partant , Illustrissime Seigneur , ie conclus aux peines que iugerez raisonnables , & qu'il aura meritées ; ayant prealablement fait droit à la Marquise de Rine , pour n'auoir pas publié son mariage , comme il luy auoit promis.

Radamante , parties ouyes , & voyant , qu'au fonds il sembloit qu'obliquement ils se fussent faits mourir l'un l'autre , les renuoya hors de cour & de procez , leur faisant defense de se plus inquieter l'un l'autre. Surquoy se separans , Albigny & Cauouret , ayans tousiours la main sur la gorge , & regardant le Duc de mauuais œil , suivirent le Marquis , à la rencontre de plusieurs Espagnols & Italiens qui se firent tous grand accueil , excepté le Duc d'Alue , qui avec vn *Vos* seulement caressa la compagnie , & le Marquis , prenant la parole dit qu'il venoit se ioindre avec eux , pour leur dire que la



coustume n'estoit point changée en Espagne, de mal traicter tousiours ceux qui leur auoient rendus plus de seruices, Et là se trouuerent Fernand Gonzales, le Cardinal Ximenes, le Marquis del Vast, Iuan d'Austria, Fernand Gonzague, & le Prince de Parme, lesquels voulurent tous ouyr le desastre de ce valeureux homme, lequel il leur raconta: Et D. Iuan d'Austria, prenant la parole dit, ne vous plaignez plus, puis qu'à moy, apres auoir bien serui, sans considerer ma naissance, il m'en a cousté la vie: Et à moy, dit le Prince de Parme, qui eus le commandement des Armees apres vous, qui sçauiez le miserable estat où vous laissastes la Flandre, & auez sceu depuis en quel lustre ie remis les affaires par la prise d'Anuers qui esmerueillait tout le monde, & qui m'eust facilité le moyen de reduire ces Prouinces en obeyssance, sans les deux voyages que fort mal à propos on me fit faire en France, pour recompence, on m'osta mes pouuoirs, me renuoyant en Italie avec vn morceau, qui me fit passer icy dans la fleur de mon âge, m'ayant soupçonné d'auoir pésé à me conseruer ces Prouinces avec l'aueu & le soustien des François. Payement ordinaire pour ceux qui ont bien seruy ces gés. Je ne parleray point de moy, dit le Marquis del Vast, parce que les François mesme me loient, encore qu'ils m'ayent défait à Serisoles: apres plusieurs signalez seruices, & auoir pour eux souillé mon ame & mon

honneur au meurtre que ie fis faire de Fre-  
goze & Rincon, ils n'ont pas laissé pour cela  
de me despoüiller de mes charges.

Alors le Duc d'Alue faisant trois ou qua-  
tres desmarches, & relevant les moustaches  
avec cette mesme apparence d'orgueil,  
qu'il auoit tousiours eüe au monde, avec vn  
ton graue & d'indignation, dit : Qui est-ce  
qui a seruy ces Princes en de plus grandes  
charges, & avec plus d'autorité, que moy ?  
Quels Capitaines y a-il eu depuis plusieurs  
centaines d'années, qui aye commandé si  
long temps & porté leurs drapeaux en tant  
de pays ? Qui est-ce qui ne m'a veu faire la  
guerre en Italie, en Espagne, en France, en  
Hongrie, en Allemagne, en Flandre, en Af-  
rique ? & avec tout cela, ie fus à la grande  
merueille de tout le monde, sans auoir eu es-  
gard, ny à mon aage, ny à mes seruices, con-  
finé dans Vsede, pour auoir marié mon fils,  
qu'on auoit emprisonné sur ce qu'o luy vou-  
loit faire espouser vne Dame du Palais, luy  
imputant qui luy auoit promis mariage : Et  
comme la resolution de la guerre de Portu-  
gal fut prise, ne sçachant sur qui ietter les  
yeux que sur moy, on me fit escrire par vn  
Secretaire seulement, pour me commander  
que d'as trois iours i'eusse à me rendre à l'ar-  
mée, qui n'estoit qu'à dix mille de Madrid,  
où estoit la Cour, sans que iamais on me  
voulût permettre d'en approcher : & ce qui  
ne fut pas moins estrange, c'est que le Roy

faisant prester le serment par tous les Grâds au Prince D. Diego son fils, il refusa de me recevoir à cette action, qui se faisoit si proche du lieu où i'estois, ny ne m'escriuit, ny ne me voulut rien dire, ny traicter avec moy sur le subiet de cette guerre, qui me faisoit plaindre de ce qu'on m'enuoyoit conquerir des Royaumes traissant mes chaisnes: pour monstrier que le commandement d'une si grande Armée ne laissoit pas de faire voir à tout le monde, les marques de mon esclavitude. Mais cela ne m'estonne pas, puis que le Cardinal Ximenes, que ie voy là disant son Breuiaire, n'en eut pas meilleur marché, ayant conserué luy seul l'Espagne à l'Empereur, foulée aux pieds par tous les plus puissans de l'Estat, qui ne pouuans souffrir son autorité, luy demandoient lettre de sa vocation, qu'il leur monstra consister en ses hommes & en ses canons, avec lesquels il remedia à tous les desordres qui se presenterent, & pour sa recompense, on croit qu'on l'empoisonna ne l'ayant peu reduire à se gouverner par l'aduis des Flamans, qu'on luy enuoyoit pour luy oster peu à peu son credit, qu'il n'employoit toutes fois que pour le bien de l'Espagne & de son Maistre.

Alors le grand Capitaine avec vn petit soufris, dit: Et quoy, Messieurs, vous qui auez esté des derniers, & qui auez vescu apres moy, comment est-ce que vos desastres

ont esté plustost racontez que les miens? Et qui est-ce qui ne sçait, qu'apres auoir cōquis vn Royaume, on m'a demandé conte de la despence? Mais i'arrestay bien mes Commissaires, quand ils virent le premier Article, qui contenoit quatre millions en espions, & auparauant ils pensoient me payer de l'honneur que i'eus de faire le quart à la table des deux Roys de France, d'Espagne, & sa femme, à Sauonne, & apres qu'il leur seroit loisible de me traicter de Traistre, qui auois aspiré à me rendre maistre du pays, & fauorisé durant sa vie l'Archiduc Philippe: à quoy ie ne songeay iamais, quoy que ce fust vn tres aimable Prince, aussi sincere que son beau Pere & sa belle Meré, estoient corrompus: comme ils le témoignèrent bien, quād apres l'auoir engagé dans le Traicté de Blois, où il auoit accordé la Paix en leur nō, il demeura affrôté par la perte de Naples, que i'acheuay de conquerir lors, suiuant l'ordre que i'en auois de iour en iour. Et les François eussent esté aussi cruels comme ils sont bons, ils pouuoient luy faire payer les frais d'vne telle perte & ne le laisser pas aller si facilement cōme ils firent. C'est pourquoy ie n'ay pas eu tort de dire que pour m'obliger de croire vne autrefois aux sermens de Ferdinand, ie voudrois qu'il iurast par vn Dieu qu'il recogneust, & auquel il eust croyance.

A la verité, dit le Marquis de Pesquaire, c'estoit vn grand trōpeur. Il est vray respon-  
dit



pondit Ruy Gomez ; mais ne voyez-vous pas Moron, qui se mocque, de ce que vous blasmez les trompeurs, veu le trait & que vous luy iouastés avec Antoine de Leue : & non-obstant vous n'avez pas laissé d'en taster comme les autres :

Alors le Prince d'Oria prenant la parole, dit : l'ay esté le plus fin, car sçachant bien, qu'il n'y a point de seruices qui puissent obliger les Espagnols, & que par vos exemples ie voyois, qu'au lieu de grâces & récompenses, ils conceuoient des ialousies & des soupçons, qui les auoient portez à vous perdre ; pour euitier cela, qui n'a iamais manqué à vn seul de ceux qui ont esté des plus renommez parmy eux : apres l'entreprise d'Arger, que ie ne pris pas, ie renonçay à ma charge de General de la Mer, cōtre l'aduis de plusieurs, qui me disoient que telles choses ne se quittoient iamais volontairement : & fis voir, que ie le sceus dire & faire, & que sans eux ie pouuois viure avec lustre : car ie redoublay toutes mes despences, que i'ay continué telles iusques à ma mort.

Je voudrois en auoir fait autant dit Dom Ferrand. Car apres de si longs seruices rendus à cetté nation, ie n'eusse pas eu la honte d'estre depossédé du Gouvernemēt de l'Estat de Milan, pour le donner au Duc d'Alue, qui n'y fit rien qui vaille ; & si ie n'eusse eul l'industrie de verifier la fausse escriture mise sur mes vrais seings, par l'artifice du Castellán &

Chancelier de Milan, ie ne ſçay à quel point de hôte & de deshonneur on ne m'eult point reduit.

Alors le Prince de Parme, plus ſerieux que les autres, s'approchant de luy & du Marquis, leur dit : Nous ſommes bien mal-heureux d'auoir tousiours ſeruy les Rois d'Eſpagne contre noſtre patrie. Vous auez plus de raiſon de vous en plaindre qu'aucun, dit le Marquis: car l'Empereur Charles fit tuer voſtre grand Pere, & voulut deſpoüiller voſtre Pere, & l'eult fait, ſans l'aſſiſtance des François.

A ce propos Ruy Gomez s'approcha avec ſa gentilleſſe accouſtumée, excuſant cette action, & diſant que l'Empereur n'y auoit point de part, & que c'eſtoit vne conſpiration de Citoyens pure & ſimple, qui auoit eſté preueüe par vn Negromantien, qui enquis du Duc Pier-Luigi de ſa fin, luy fit mettre ſur vne table vne teſte de mort, couuerte de chandelles de cire noire, de laquelle ſortit vne voix diſant: qu'il deuoit eſtre tué, & que le nom de ſes meurtriers eſtoit eſcrit dans le reuers de ſa Monnoye, où il y auoit *P L A C*, qui vouloit dire, *Placentia*. Et de fait, *Palauicini*, *Landi*, *Anguiſcioli*, *Conti*, deſignez par ces quatre lettres, furent ſes maſſacreurs, & non pas l'Empereur.

Horace Farneze, Duc de Caſtre, s'eſtoit approché à ce diſcours, & prenant la parole, dit : Vous diſputez tous de ceſte action de-

nant Dom Ferrand qui en fut l'auteur, ou pour le moins il en donna le conseil. Je n'y ay nulle part, dit le Gonzague, & de cela on ne peut accuser l'Empereur, que d'auoir approuué le fait, & gardé quelque temps Plaisance aux Mineurs, comme il se void par les quatre Vers qui en furent faits bien-tost après, que ie porte tousiours sur moy; à cause que plusieurs m'en ont voulu blasmer: & pour ma iustification ie m'en vay vous les lire.

*Casaris iniussu Farnesius occidit Heros:*

*Sed iussu data sunt premia sicarijs.*

*Tres sunt heredes, Dux, Margherita, Gemelli:*

*Hunc socer, hanc geniter, hos spoliavit auus.*

Par là vous voyez qu'Vllon, Auteur Espagnol, est vn menteur, qui escriuant la vie de l'Empereur, l'accuse d'auoir fait faire ce meurtre.

Ne parlons plus de cela, dit le Duc de Parme, l'opinion la plus fauorable des deux ne vaut rien; & pleust à Dieu que i'eusse seruy ce Prince que ie vois s'approcher de nous! j'aurois vescu plus long temps, & aurois esté mieux recompensé.

Surquoy tournant visage ils apperceurēt le Grand Henry, avec vne grande suite; & luy appuyé sur les bras de Villeroy & du Presidēt



Ianin, s'arresta sur le bord d'une grâde fontaine, où soudain la Varène arriva tenant en ses mains plusieurs paquets, qui furent deliurez à Villeroy pour les déchiffrer, Le Roy demanda cependant, Quelles nouvelles courent? i'ay ouy parler de quelques parties contre le Cardinal de Richelieu. Qu'est-ce. Cela n'est rié, dit Villeroy, s'il n'est survenu quelque chose depuis les dernières depeschés, qui portoient le desordre survenu, & le raccomodement qui auoit suuy, à la grâde instâce qu'en auoit fait le Roy. I'en suis bien aise, dit le Presidēt Ianin, car ie l'ay tousiours estimé, & creu qu'il reüssiroit aux affaires; & luy ay dit souuent, qu'il prist courage, & qu'il auroit son temps; & vostre Maiesté mesme le voyoit de bon œil dés qu'il estoit Euesque de Lusson. Quoy? dit le Roy, c'est le frere de Richelieu? Il est vray que ie l'aymois, & vous sçauéz bien & Monsieur de Villeroy, que i'estois resolu de le faire Cardinal, & l'eusse mis dās mes affaires, si i'eusse vescu plus long temps. Il y a bien reüssi, dit Zamet: car depuis qu'il est au Conseil toute le France a changé de face: & quā ce ne seroit que la Rochelle est prise & razée, il y auroit dequoy se contenter. Comment, dit le Roy, cela est-il possible, Roquelaure? auez vous entendu ce qu'il dit? Ouy, Sire, respondit-il: & qui ne le sçait pas? Et le bon sentiment qu'en montra vn homme que vous cognoisiez bien, quand il en eut la nouvelle, s'escriant nous sommes perdus. Il est vray



qu'il vfa d'un mot plus sale qui rime à cettuy-  
 là; mais on ne l'oferoit dire icy. Et pēsez-vous  
 qu'on viue à cette heure comme au temps du  
 vieil siege, où vous & les autres l'empeschiez,  
 & preniez autant de peine à la sauuer, qu'on  
 a fait à cette heure à la prendre? Et donc les  
 pauvres Huguenots sont reduits à Montau-  
 ban, Castres, Millaud, Nismes, & Vzez, dit le  
 Roy? Rien de tout cela, Sire, dit Roquelaure?  
 car toutes ces places n'ont plus ny fossez ny  
 bastions: & sur la foy du Cardinal, Montau-  
 ban a receu telles forces qu'il a voulu, & les a  
 retirées trois iours apres, n'ayant fait vn seul  
 logement dans les maisons, demeurans touf-  
 jours sur leurs armes dās les places & les ruēs,  
 sans qu'il aye esté pris vn morceau de pain  
 qu'en payāt. Je ne sçay si ie dois croire ce que  
 vous dites, respond le Roy, car ie le trouue  
 estrange. Et les Seuennes, Foix, le Dauphiné,  
 & le Viualets, tiennent pour le moins enco-  
 res? rien de tout cela, dit le Viconte de Por-  
 tes: toutes ces places sont Catholiques, brus-  
 lées, ou sans fortifications. Cōment bruslées?  
 dit le Roy. Ouy, bruslées, Sire, respond-il:  
 car Priuas a esté mis en cendre, pour chastie-  
 ment d'auoir esté l'origine de toutes les sedi-  
 tions; & la premiere qui aye voulu se deffen-  
 dre contre le Roy vostre fils, depuis son re-  
 tour d'Italie. Il n'y est pas demeuré pierre sur  
 pierre, dit le Marquis d'Vxel: car i'en ay bon-  
 nes relations, & qui portent que dans les  
 Montagnes de Viualets l'armée y volloit, &

que iamais autre Roy n'y auoit passé: Qui a donné vn tel effroy à tout le reste, qu'Alets estans aux abois se rēdit, & là tout les Deputez Huguenots y vindrent & y firent la Paix. Nous auons veu l'Edit avec merueilles, dit le President Champigny (touffant & crachant, de peur que le Garde des Sceaux du Vair ne luy reprochast encores qu'il auoit la gorge pleine d'arrests quand il opinoit): Car tous les precedents Edits portoient titre simplement d'Edit & Declaration faite par le Roy sur la purification des troubles de ce Royaume. Mais cestuy-cy porte, Edit du Roy sur la grace & pardon donné au Duc de Rohan, au sieur de Soubize, & à tous autres subiets rebelles, avec l'abolition des negociatiōs tant avec les Anglois qu'avec le Roy d'Espagne & Sauoye, & le bannissement des Chefs: chose qui ne s'estoit iamais veüe iusques à maintenant qui a donné grand hōneur au Cardinal, & grande flettrissure à ces pauvres Freres en Christ qui n'ont autre consolation dans leur desastre, sinon celle de mourir de la main d'un si grand Roy.

Pour les Anglois, ie leur pardonne: car ils sont de m<sup>e</sup>me Religion qu'eux, (dit le vieux Duc de Mayenne) mais avec les Espagnols, i'en doute encores qu'on le die. Car depuis qu'ils se virent trompez à ces fameux Estats de Paris, i'ouys iurer plusieurs fois le Duc de Feria & Dom Diego d'Iuara, qu'ils ne hazarderoient iamais plus leur argent en France. Ils

l'ont fait si souvent depuis, dit le Chancelier de Sillery, qu'il ne faut pas s'asseurer en leurs sermens. l'ay veu leur dernier Traité avec les Huguenots & le Duc de Rohan, qui est bien construit selon l'humeur d'Espagne. Car il porte, Que ce que le Roy en fait, est comme estant estroitement obligé à la conseruation des Estats & Royaumes, qu'il a pleu à Dieu luy donner; & à cet effect de se seruir de tous les moyens propres, licites & necessaires qui se presenteront, & le tout sans autre interest, que celuy de la plus grand gloire de Dieu: Pour à quoy paruenir il faut payer les Huguenots, pour maintenir la guerre dâs le Royaume. Ce qu'ayant sa Maiesté fait voir en son Conseil de conscience, composé de gens de grande integrité, il a iugé estre conuenable à la iuste defence de ses Estats, contre vne si iniuste action, comme celle que le Roy de France fait, violant tout droit & iustice ( qui estoit, de ne luy vouloir pas souffrir l'oppression de ses alliez. ) Et pour paruenir à leurs fins, ils offrent trois cens mille ducats pour l'entretien des gens de guerre en Prouence, Languedoc, & Dauphiné, & quarante mille de pension au Duc de Rohan, huit mille à son frere, & dix mille pour ceux qu'ils voudront gratifier: Moyennant quoy ils entretiendront tousiours la guerre tant qu'il plaira au Roy Catholique durant les iustes causes, qu'il a de ce faire. Croiroit-on iamais telles choses de ces gens là, qui ne seroit bien in-



formé de toutes les procédures ? C'en'est pas la premiere fois, dit le Roy, qu'ils s'estoient voulu seruir des Huguenots. Car de mon tēps ils me firent de grandes offres, & n'y voulus entendre, & nul de mon Conseil ne pensa iamais de m'en parler. C'est pourquoy ie m'estonne comme ceux-cy se sont laissez emporter a vne telle faute, & cōment les Espagnols, qui sont tant les Religieux, & m'ont tousiours reproché l'assistance que ie donnois à mes alliez de cōtraire Religion, se sont voulu charger d'un si grand deshōneur. Ils n'ont iamais fait autrement (dit le Pere Coton) car ils ont tousiours eu la Religion dans leurs Œures, & rien moins que cela dans le cœur. Vostre Maiesté protégéoit les heretiques, nō comme tels, mais comme ses alliez, que par honneur & par la iustice des Traitez vous ne deuiiez pas laisser perdre ny empieter, afin de vous conseruier l'affection de tous ceux qui sont attachez avec la Courōne: & puis, n'est ce pas impieté, de croire que les Princes heretiques ne soient pas Princes legitimes dans leurs Estats, & que la diuersité de croyance empêche le droit de protéger ceux auxquels on l'a promis, quand on veut vsurper leur bien ? C'est vn point delicat que vous traictiez là, mō Pere (dit le Cardinal de Berrulle) & croy qu'il vaut mieux n'en parler point du tout: car il y a penchant de tous costez. Pourquoy Monsieur, (dit le Pere ?) Salomon ne bastit-il pas le Temple de Dieu avec l'aide  
des



des Tyriens idolatres, & les Machabées, qui estoient aussi gens de bien que nous ? Perdirent-ils leur reputati<sup>o</sup>n, pour s'estre alliez avec les Romains ? Mon Pere, n'en parlons plus (dit le Cardinal) vous sçavez bien que le Roy de Juda fut blasmé par vn Prophete, des'estre allié avec le Roy de Syrie. Non pas de l'alliance, dit le Pere, mais de sa trop grande confiance en ce secours, comme en sa maladie en celuy de ses Medecins, qui ne fit pas pourtant condamner la Medecine. Partant ie persiste & dis, que pour se deffendre & ses alliez, il est loisible de se servir de tous moyens licites & possibles, & de ceux mesmes qui ont esté aux siecles passez pratiquez par les Espagnols, qui sont tant les scrupuleux.

Mon Dieu, dirent en soupirant le Greffier Senault & Chassebras, les Espagnols nous ont toujours semblé si bons Catholiques, que pour mourir ils ne voudroient pas auoir aucune communication avec les Heretiques, suivant le dire de l'Apostre, *Nec dixeris eis Ave*. Vous l'entendez, reprique le Pere: Et Ferdinand Roy d'Espagne, par le conseil de Roderic, ne se seruit-il pas des Mores pour se deffendre contre le Pape, le Concile, & l'Empereur Henry second, par le moyen dequoy il se garantit de la suiecti<sup>o</sup>n del'Empire, où l'on le vouloit reduire ? Et que direz-vous de cette horrible alliance d'Aurelius avec les Mores, leur payans tous les ans cent ieunes filles de Tribut ? Et l'Empereur Charles, pour parler

destemps voisins, à la prise de Rome, n'auoit  
il pas huit mille Lansquenets Protestans, qui  
cômirent toutes sortes de sacrilèges & d'im-  
pietez aux Eglises & choses sacrées par l'espa-  
ce de sept mois, qu'ils tindrent le Pape Cle-  
ment assiégué dans le Chasteau S. Ange avec  
tous les Cardinaux? Et ne sçauiez vous pas, dit  
le Cardinal de Pelene, que ce pieux & tres-  
pieux Empereur en prit le dueil, & fit faire  
processions generalles en Espagne, lors qu'il  
sceut sa deliurance? Et vostre Eminence ne  
sçait-elle pas, dit ce bon Pere, que c'estoit se  
moquer de Dieu & des hommes? que c'estoit  
luy qui le tenoit prisonnier, & qui ne le mit  
jamais en liberté, qu'après luy auoir fait payer  
huit cens mille escus, & puis il en solemnisa  
la feste? Mais que, di-ie, ou que ne pourrois-je  
dire sur ce suiet? Ce mesme Empereur ne fit  
il pas ligue offensive & deffensive avec Hen-  
ry huitième d'Angleterre, qui auoit renon-  
cé sa foy, & repudié sa Tante, pour espouser  
sa Garce; & cela pour auoir plus de moyen de  
ruiner la France?

Ne fit-il pas vn autre braue trait, de pren-  
dre & se seruir des Galleres du Pape pour re-  
stablir Muleassen, Mahumetiste, dans Tunis,  
qui en auoit esté chassé par Barberousse: Mais  
son fils Philippes secou, en tout le reste de ses  
actions vn des plus sages Prince du monde, à  
quoy pensoit-il, quand il abandonna ses sub-  
iets naturels à la mercy des Heretiques, qu'il  
estoit obligé par droit diuin & humain de

Conserver, & d'en rendre bon compte deuant Dieu, pour venir faire la guerre en France, où il n'auroit point d'intérest, & dépêdre son argent ailleurs, & laisser perdre ses pays? Et ceste coutume est la raison, pour laquelle on se bâte contre cette nation, à l'imitatiô des autres Rois d'Espagne, qui s'unirent tous contre Alphonse 8. Roy de Castille, faisant la guerre aux Mores, pour ne le souffrir pas s'accroistre & se rendre trop puissant.

Demandez à l'Eminentissime Cardinal d'Ossat, s'il n'escriuoit pas autrefois, qu'il ay-  
moit mieux les Espagnols dans les Pays bas-  
vieillissans, harassés, blessez, & meurtris, que  
non pas de les voir dans les costes de France,  
puis que c'est leur humeur de ne laisser pas le  
monde en paix? Je croy que pour le salut des  
Estats il ne faut pas tousiours attendre que  
Dieu face des miracles, & qu'il est permis de  
se seruir des moyens qu'il a donnez pour se  
defendre contre les vsurpateurs de son bien,  
ou de l'autrui.

Au moins ne desauoüerez-vous pas, dit le  
celebre Bussi le Clerc, que l'Allemagne & le  
saint Siege ne soient fort obligés à la maison  
d'Austriche: car sans elle il n'y auroit plus ny  
Pape ny Religion. Vous me pardonnerez,  
respond le Pere: car s'ils en eussent esté creus,  
ils auroient esté maîtres absolus de l'un & de  
l'autre. C'est pourquoy le Pape & les Alle-  
mans sont les plus interessez des opposer à la  
grandeur de cette Maison, qui ne pretend qu'à



mettre bas le premier, pour en disposer à sa mode; & abolir l'election des Emperours, pour se rendre l'Empire hereditaire. De là est venu que vous auez veu tant de guerres colorees de Religion, & les Papes si souuent malmenez & outragez en leurs personnes & en leurs seruiteurs: & sans parler de tous, i'allégueray seulement Frideric II. qui à la persecution y adioustoit la risée, quand ayant par ses adherans fait prendre sur la mer trois Legats du Pape, & plusieurs Prelats, comme on en uoya vers luy, sçauoir ce qu'il vouloit qu'on en fist, il mit seulement au bas de la lettre qu'on luy escriuoit ces deux Vers,

*Omnes Prælati Papæ mandante vocati,*

*Et tres Legati veniant hucusque Legati.*

La memoire de cette action iointe à plusieurs autres, deuroit tousiours faire trembler les Papes, & cōsiderer que l'Empire estant en vne famille si puissante, engendre cette crainte vniuerselle de tous les hommes, qui maintient le Schisme, rend l'alliance des Princes Schismatiques necessaire, & fait qu'il est difficile de voir iamais la paix en la Chrestienté.

Et quoy que le Roy eust pris grand plaisir en cette digression, neantmoins l'impaticence le prit d'entendre la lecture de ces Lettres, qui luy fut faite par Villeroy: lequel pour en faciliter l'intelligence, prit l'affaire de plus haut, &

parla de ce passage admirable des Alpes que son fils auoit fait, & forcé le Pas de Suze; que la forteresse luy auoit esté renduë; qu'il auoit secouru Cazal & traité avec le Duc de Sauoye, pour conseruer la liberté d'Italie, & empescher l'oppression du Duc de Mantouë: En suite, dequoy estoit suruenüe la ruine des Huguenots, & la Paix: & parce que tout cela auoit esté contredit par aucuns deuots pretendus. Le Cardinal de Richelieu demeura ferme en son aduis avec le Marechal de Schomberg, que l'euénement a fait voir le seul & ynique qu'il falloit suiure; & neantmoins cela luy a causé la haine de plusieurs, qui firent tant par leurs artifices, qu'il fut traité comme nostre Seigneur. Car par tous les chemins où il passa, les peuples les remplissoient de Rameaux, & bien-tost apres on le voulut crucifier.

Après cela, pour faire la guerre ou la Paix, on iugea que sa personne estoit necessaire en Italie, ayant à faire avec Spinola, & au Duc de Sauoye, inconstant en ses desmarches, & qui vouloit faire le neutre au commencement; mais comme on le pressa de parler clair, on le veid en vn instant se declarer ennemy de la France: qui fut cause que, sans temporiser d'auantage, on s'alla loger sous Pignerol, qui fut emporté en vnze iours, ville & Chasteau, à la barbe des Espagnols, Spinola, Collalto, & le Duc, y estans en personne. Quoy? Pignerol est entre les mains de mon fils? cette place si necessaire pour les entrees en Italie? Il me sou-

uient que lors de mon grand dessein, j'auois donné charge à Bullion duquel ie me seruois fort, de n'accorder rié avec le Duc de Sauoye, qu'en me donnant pour seureté cette place, que ie tenois fort importante; Et pour laquelle auoir renduë vn peu legerement, le Roy mon predecesseur fut fort blasmé autrefois.

Mais il y a bien plus, dit Villeroy: car on a fortifié Briqueras, emporté les Forts des Val-  
lees, Auigliane, Saluces, toute la Sauoye, excepté Môtmellian qui ne se peut secourir, battu les Espagnols aupres d'Auigliane, à Carignâ, & fait leuer le siege de Casal; sans se soucier des protestatiôs qu'un certain personnage faisoit, declarant qu'il n'estoit point de cét auis, puis qu'ils sçauoient le Traicté fait à Ratisbonne, lequel il yalloit bien mieux suiure, que d'aller hazarder leur vie & la reputation des armes du Roy, en vn voyage qui de soy estoit impossible, & plein de tant d'inconueniës, que le profit qui en pouuoit arriuer estoit si petit au prix, que c'estoit temerité & tres-mauuais conseil d'entreprendre d'vser de force pour yne chose qui estoit assurée & entre leurs mains.

Mais le Marechal de Schomberg, qui est de vostre nourriture, qui fut fort bien secondé de ce braue vieillard le Marechal de la Force, considérant la gloire qui s'acqueroit en secourant cette place, le bien qui en reuenoit au Roy, couronnant par là toutes ses actions passées, qui perdoient autrement beaucoup de leur



lustre, & les serments faits sur ce suiet au Cardinal de Richelieu, qui eust encores entrepris ce voyage & commandé l'armée pour le secours, sans les machines de la Cour cōtré luy, & se voyant mis en la place de son plus cher & meilleur ami, a esté si heureux, que d'auoir executé ce qui sembloit impossible aux Espagnols & à plusieurs autres, qui ne croyoient iamais, que dās vn pays ennemy on peut conduire vne armée, & la nourrir pour le temps qui seroit necessaire à cette entreprise. Il surmonta neantmoins toutes ces difficultez sur la terre, comme celles de la mer au secours de Récōtre les Anglois, qu'il deffit si brauement, qu'il se peut vāter d'auoir acquis la gloire des deux plus belles actions que Capitaine aye fait depuis cinq cens ans en France.

Ce Cardinal l'entend (dit le vieil Marechal de Brissac) d'agir ou faire agir avec telle resolution. Car contre les Espagnols il n'y a que d'estre hardy, comme ie l'ay pratiqué commandant des armées en Piedmōt, où du commencement que Ferrand Gonzague vint contre moy, il brusloit & rauageoit tout. Ie le requis de bonne guerre sans qu'il me voulut ouyr: ce que voyant, ie fis comme luy, & en mesme temps il me demanda ce qu'il m'auoit refusé. Mais ie trouuay bien plus plaisant quand le Duc d'Alue fut mis en sa place, qui arriva en Italie avec vn son de brauades & de menaces, qu'il sembloit qu'il d'eust tout foudroyer. Ses apparats furent pompeux dans la

seule ville de Milan il fit vne leuée de huit  
cens mil escus, vne nouuelle fonte dás le Cha-  
steau de trente canós, fait publieryne leuée de  
neuf mille bœufs pour ses Charrois, fait faire  
nôbre de bateaux portatifs, fait venir d'Alle-  
magne par le Lac de Garde des milliers de ca-  
ques de poudre, comme aussi de Gennes &  
Naples, & bien qu'il eust vne armée de trente  
mille hommes & cinq mille chevaux, equipage  
de quarante canons, & assignation pour  
l'armée, de si mois, il publioit hautement de  
nouuelles leuées de dix mille Italiens, & autāt  
d'Allemands: ce qu'il faisoit pour faire peur, &  
donner esclat à la grādeur de son Maistre. La  
fin de cela fut, que ie luy enleuē Vulpian, place  
importāte à nos affaires, & qu'il s'alla échouer  
deuant Santia, lieu incogneu, que i'auois for-  
tifié: où ayant perdu beaucoup de gens, ie l'en-  
fis desloger avec tant de desordre, que laissant  
Sigismond Gózague dans les trenchées avec  
neuf Compagnies de son Regiment, & tous  
les Marchands & Viuandiers, il nous donna  
moyen de faire bōne chere sans nouuelle des-  
pence, & sans plus seiourner, quitta le Pied-  
môt, & s'en alla au Royaume de Naples, cōtre  
le Duc de Guise, qui eust mieux fait de croi-  
re mon cōseil, d'acheuer le Milanois qui nous  
estoit facile, & puis le reste estoit entre nos  
mains. Je redis encore, qu'à l'endroit des Es-  
pagnols, il n'est que d'y aller la teste baissée: on  
les trouue souples, pourueu qu'on ne les mar-  
chande point, comme ie voy qu'à fait ce Car-  
dinal

Alinal, qui a beaucoup de cōformité avec moy & principalement celle là, d'estre fidele à son maistre, & tousiours trauersé comme ie l'ay esté par mes ennemis, qui comme les siens ont mieux aimé hazarder de tout perdre, que de laisser faire le bien.

On escrit, dit Villeroy, suiuant ce que dit Monsieur le Marechal, que toutes ces menées ont fait vne grande playe à la France: car elles firent partir le Cardinal d'Italie, où son Armée, qui auoit vescu avec ordre & grande discipline, faisant payer & chastier, se licentia à mille desordres, en fin tout se dissipapar son absence: & par la propre confession de Spinola, s'il eust demeuré, Casal n'auroit point esté assiégé, ny, peut estre: Mantoue pris. Car les Allemanés estans contrainsts par sa presence de demeurer tousiours vnīs & ioints avec Spinola, ils n'auroient pas eu la liberté de retourner à cette entreprise si malheureuse & si facilement executée: & cette nation s'estant portee si insolamment contre les alliez de la France, fait bien voir son ingratitude. Car si on n'eust point appaisé les troubles qu'ils auoient, & laissé faire Bethlen Gabor, il eust secouru le Boëme, auquel cas ils se seroiēt trouuez tellemēt occupez, qu'ils n'auroiēt pas eu le moyen d'aller au sac de l'Italie: Mais en fin à quoy aboutit cet affaire du Cardinal, dit le Roy? Qu'on la voulu esloigner de la Cour, dit Villeroy. A cette parole



tous les assistans firent vn cry, avec vn Iesus, les mains iointes, qui fut entendu de toutes les campagnes voisines, monstrans par là l'estonnement d'une telle nouvelle, qui attira beaucoup de gés, les vns dolents, & les autres qui s'en resiouyffoient. Le Cardinal Polus dit en son Anglois, que Buquinkan voudroit auoir donné cent mille liures Sterlins & qu'il fust par terre. Le Duc de Lerne replique: cela n'est rien, car D. Iuan de Villela m'a dit, que l'Oliuares en donneroit deux millions d'or, parce qu'il a perdu ses escrimes contre luy, avec grand peril des Estats de son Maistre, Ses fougues estoient bonnes contre moy qui estois vieux, & mes enfans foibles & de peu d'esprit, & tous ensemble hors de la faueur que nous auions eüe, mais contre vn grand Royaume, qui a vn ieune Roy belliqueux, assisté de bons & fideles Ministres, luy qui n'a iamais sorty du pays, ny veu ny guerres, ny affaires, pensoit-il que toute la terre deust obeyr à sa fortune? Il s'est trompé, & se trompera tant plus il ira en auant. Il a fait brèche à l'honneur d'Espagne par les vsurpations iniustes qu'il a entreprises, qu'il a faillies; & ausquelles il ne cessera iamais de travailler pour reparer sa faute, qui se fera tousiours plus grande, & en fin le ruinera. Car comme on sera lassé de ses desordres, on l'accablera. Et comment s'en pourroit-il garantir, puis que i'ay fait naufrage, moy qui

estois aussi doux qu'il est turbulent ? qui n'auois autre but que de maintenir les deux Courônes en paix pour conseruer nos Indes & maintenir la guerre en Flandres contre les maudits rebelles & mescreans ? On a veu comment de mon temps les choses sont allées avec prosperité : & depuis que cest estourdy gouuerne , on voit au contraire les Indes rauagées. Les Heretiques qui ont quasi tousiours tenu la campagne , pris les places imprenables de mon temps , & avec cela il a esté si peu sage, que de resueiller la guerre en Italie, que j'auois tousiours empêchée, quoy qu'il y eust le Comte de Fuentes assez mal aisé à gouuerner , qui ne demandoit autre chose par les bons conseils que luy donnoit le Duc de Sauoye : mais ie tenois la chose si perilleuse , que ie m'y suis tousiours opposé, pour estre bien plus aisée à commencer qu'à finir, comme on le verra à cette heure que les François y ont pris pied, qu'il sera bien difficile de leur offer, étant à craindre qu'ils ne vueillent laisser là tousiours vn os à ronger aux Espagnols, qui les reünira à la fin.

C'est pourquoy ie croy que non seulement Oliuarez voudroit donner deux millions, mais quatre, & qu'on l'eust ruiné, de crainte qu'il ne le face perir : parce qu'il est si heureux, que tous ceux qui luy sont contraires perdent la vie, comme Buquinkan, le Duc

de Sauoye, Spinola Collalto, & plusieurs autres. Et luy mesme a desia eu quelque secourse: qu'il prenne garde à luy, car il n'y a point de sagesse contre la fortune.

Après l'estonnement passé de tous, le Roy demanda si c'estoit son fils qui auoit voulu si mal recompenser vn tel seruiteur? Non Sire, dit Villeroy, au contraire il l'a soustenu. La chose vient d'ailleurs. Mais le bon que i'y vois pour luy, c'est qu'on l'a attaqué dans son fort, c'est à dire dans vn temps que tout le monde disoit du bien de luy, & avec raison, veu les grands seruices qu'il venoit de rendre, & ses bonnes intentions qu'il ioignoit à celles du Roy, de biẽ-tost faire leuer & oster la pluspart des pesans fardeaux dont le pauvre peuple est chargé & sur tout de faire bien tost esclorre ce bien dans la bonne ville de Paris. Car si la chose eust esté autrement, ie crois qu'il luy fust arriné comme à Aristides, de souffrir du mal pour estre homme de bien, scachant de bonne part qu'il est tel, & qu'il craint Dieu, auquel il a la mesme confiance de Iob, quand il disoit *Pone me iuxta te, & cuius vis magnus pugnet contra me.*

Ie loüe mon fils, dit le Roy, de l'auoir maintenu: car s'il l'eust abandonné, il perdroit tout son credit, & n'eust iamais trouué homme qu'il eust voulu seruir: & de plus, il estoit à recommencer: car il est le maistre maintenant, ou n'ayant plus vn tel Ministre



il eust bien eu des affaires à desmesler, ne connoissant point d'homme à mettre en sa place & quand il en auroit, auant qu'il y fust accoustumé comme avec cestuy-cy, son Royaume & ses affaires seroient en grand desordre, veu que tous changemens de telles personnes sont tres perilleux. C'est pourquoy ie croy qu'on ne le pouuoit laisser aller, car il estoit trop necessaire.

Ce n'est point necessité, Sire, qui le fera retenir, dit le President Ianin: c'est amitié. Car ie sçay bien que le Roy l'ayme, & doit bien hayr ceux qui auoient fait ceste menée. Et qui sont-ils dit le Roy? Marillac en est vn, Sire, dit Villeroy, qui pour payer le Cardinal de l'auoir esleué, l'a voulu ruiner, ne se ressouenant plus qu'il auoit vescu sous le Chancelier de Sillery, sans auoir iamais eu autre commission de luy que de dresser les bancs & les escabelles aux Estats de Nantes, & de visiter les escrits de Seruin. Attendez dit le Chancelier de Serilly, il en eut encore vn autre; Mais ie veux que vous sçachiez auparavant, qu'avec sa pieté, apres ma disgrâce à Tours, à la table du sieur Mangot qui eust ma place, & ne la garda gueres, il me disoit de moy publiquement, & dès que ie fus remis, il ne laissa d'estre des premiers à se trouuer en mon cabinet; & le soir comme on me pensoit donner cest aduis comme vne nouuelle, ie respondis que ie le sçauois bien, mais qu'il

falloit laisser telles choses comme les pierres  
 dedans les mauuais chemins , lesquelles si on  
 vouloit toutes ramasser : on succomberoit  
 sous le fais, qui estoit cause que ie n'en voulus  
 faire compte. Or ce que ie vous voulois dire  
 est que sous le pretexte de ceste deuotion que  
 vous sçauiez, il songea à vne affaire que ie cō-  
 fesse qui me fit rire , me proposans de r'alu-  
 mer vne Lampe fondée par Charlemagne à  
 Aix à la Chapelle ( notez cecy ) qui au grand  
 deshonneur du Royaume estoit esteinte de-  
 puis quelque temps : ce qu'il fit sonner si  
 haut , que pour l'appaiser & contenter son  
 zele , ie luy donnay encore ceste commission.  
 Mais ce qui fut bon , & donc ie ne me meslay  
 pas, c'est que ie trouuay moyen sur ce suiet de  
 ce faire donner quatre mille escus pour les  
 employer ( disoit-il ) en ornemens , qui obli-  
 geassent les Chanoines de r'alumer ce feu  
 qu'ils auoient laissé esteindre. Dequoy tous  
 se mirent à rire. Et apres, Villeroy reprenans  
 la parole , dit : On letira en fin des Maçons  
 des Carmelines pour le faire Surintendant  
 des Finances & Gardes des Seaux , & avec sa  
 beatification supposée , ne pouuant assouuir  
 son ambition , il voulut faire ruiner son bien-  
 facteur pour prendre sa place : au ieu dequoy  
 il a esté chassé, son frere emprisonné, & sa re-  
 putation diffamée. Et dit-on, qu'au mesme  
 lieu où il auoit si long temps exercé son hu-  
 milité, la resolution fut prise d'executer ce

qu'il auoit conſeillé de faire, qui fut remarquée par vne Dame s'eſtant trouuée là, qui dit en paſſant, ou par congratulation de ce grand ouurage, ou craignant peut eſtre de perdre au change, Dieu vous doint bien faire ſans auoir eu autre reſponce de Beate, qu'un petit ſouſſris. Sardonique, avec lequel il s'en alla fort gay, penſant que dans trois iours il ſeroit le ſeul Gouverneur de l'Eſtat. Il ordonnoit pour les Finances d'Italie, qu'elles ſeroient miſes entre les mains de celui que ſon frere nommeroit, donneroit les heures des conſeils particuliers qu'il auoit à tenir avec certains confidens, & declara pour dix ou douze iours de ſuite, ce qu'il auoit affaire. Et ayant veu dès le Dimanche l'orage commencer ſa ioye, & ſon orgueil redoubla en forte, que le Cardinal, l'ayant enuoyé conuier de paſſer à ſon logis auant d'aller chez le Roy, il s'en excuſa, pour auoir pris medecine, & neantmoins le Cardinal arriuant à Luxembourg, où la Reyne logeoit, il le trouua dans un petit cabinet ſeul: & luy dit ſeulement! Ho, Monsieur, vous voila! & vous diſiez que vous eſtiez malade? & paſſant outre, s'auançoit pour parler au Roy. Et luy voyant tant d'allees & venuës, commença avec un ſouſſrire dedaigneux de demander à un, qu'il fit ſéoir aupres de luy, qu'eſt cecy? il y a quelque choſe: dites moy que c'eſt? penſant lors en ſon ame auoir la victoire entiere, ce



qu'il creut mieux encor, lors qu'il sceut les discours tenus au Cardinal, qu'il creut estre sans ressource, quand il le veit partir, & qu'on luy commanda d'aller à Versailles pour, selon son aduis, prendre possession de l'Empire: mais quand il y fut arriué, & qu'on le logea à Glatigny, le Cardinal dans le Chasteau, alors il cogneut qu'il estoit bien loin de son conte, qu'il auoit à faire à gens plus fins que luy, & qu'il estoit perdu. Ce qui l'obligea d'escrire cette belle lettre qu'il donna le lendemain à Lomenie, qui luy vint demander les Seaux, par laquelle il donnoit; comme Harlequin, congé à son Maistre. Par le Corbieu, voilà vn mauuais homme; dit le President Ianin, & qui a vsé en tout cela d'vne grande perfidie; *Perfidia tantum incommodi humano generi adfert, quantum salutis bona fides præstat*; dit le Garde des Seaux du Vair, s'estonnant comment le Cardinal de Richelieu auoit procuré tant d'honneur à cét homme. Et moy encores plus, dit le Roy, qui me fait bien rabatre de la bonne opinion que j'auois de luy: Sire, ne le prenez pas là, dit le President Ianin, les plus fins sont attrapez par ces papelards, qui sont les chatemites, & sous pretexte de deuotion vous dōnent de la griffe. Et nostre Seigneur ne nous aduertit-il pas de nous garder de ces loups qui viennent avec des peaux de brebis? Ces paroles signifient le

le peril qu'il y a en telles gens, & que pour s'en garer il ne falloit pas vn conseil moindre que celuy de Iesus Christ, lequel fut aussi vendü par vn de ceux qu'il auoit choisis; & comme il sçauoit bien qu'il conspiroit contre luy: aussi le Cardinal sçauoit, il y a deux ans & plus, ses menées: mais sa patience & sa bôré, à l'imitation de son maistre, luy faisoient dissimuler, esperant qu'il s'amenderoit: & le Roy mesme declara à Messieurs du Parlement, qu'il l'eust chassé il y a long-temps sans luy.

De mauuais œuf, mauuais Corbeau, dit le Cardinal du Perron. Que pourroit-on esperer en la vieillesse d'un homme, de qui la ieunesse a esté passionnée contre l'Estat, l'ay aimé le Cardinal de Richelieu comme moy-mesme, n'ayant iamais cogneu de son aage aucun qui eust vn Genie si puissant pour l'Estat, ny si fort cõtre les Heretiques. Mais ie passe condamnation contre luy, d'auoir choisi cet homme pour amy, sans consulter le vray original des bons François. Le President de Thou, qui escriuant l'emprisonnement du President de Harlay, que voila grondant, pensant qu'on luy demande audience, met que Bussi estoit chef de ceste execution; *Stripante Marilliaco, & alijs, cruenta religione imbutis*. Ouy, repliqua Teuin, mais il n'a pas mis la peur qu'il me fit, quand à la mesme heure venant dans la cinquiesme Chambre des Enquestes, de laquelle i'estois: ie me ca-

chay foubz des fagots aupres de la Beuuette, & l'entendois iurant le Nom de Dieu, le poignard à la gorge de Maistre Pierre nostre Beuuetier, le menaçant de le tuer, s'il ne luy disoit où i'estois : & bien me prist qu'il ne me decela pas : & à Fortia d'auoir de bonnes iambes pour s'enfuit, car il luy en vouloit aussi bien qu'à moy : & s'en est tellement souuenu, qu'il ne l'a iamaïs voulu veoir au visage depuis qu'il fut esleué en ses dignitez, se le representant rousiours avec la furie de ce iour là, maugreant & reniant Dieu comme il faisoit.

Il faut oublier le passé, dit le Cardinal de Berulle, & n'y songer plus : c'est vn bon homme & pieux, qui ne blasphema iamaïs. Il l'auoit mieue excusé, dict Seruin à l'au-reille de Gillot, s'ileust reparty comme le Cardinal de Richelieu à son Capitaine des Gardes, qui se plaignoit d'vn Prelat, de ce que sur vn refus qu'il luy auoit fait, il auoit aussi iuré le Nom de Dieu; vous vous trompez, repliqua-il, Iesus, & Dieu, c'est la mesme chose, il a seulement pris l'vn pour l'autre: & puis esleuant sa voix, il dit, Monsieur, pourrez-vous nier que cet homme n'aye esté vn des plus grands ennemis de nos deux derniers Roys?

Hà ! Monsieur estes vous là, dit le Cardinal ? Vous estes suspect en ceste cause, car vous n'avez iamaïs esté d'vn mesme aduis sur nos priuileges de l'Eglise Gallicane



que vous estendiez vn peu plus qu'il ne fal-  
loit, & sur vostre *Sanctum seculare*, que  
vous tiriez de S. Paul par les cheueux, pour  
faire nos Roys Papes: & puis il vous a vn  
peu restonné sur vos conclusions, que  
vous auiez prises contre certains liures,  
où il vous lauoit bien la teste. Monsieur,  
dit Seruin, i'ay tousiours esté bon Fran-  
çois, & me suis volontiers opposé aux  
entreprises faictes contre la Couronne:  
c'est pourquoy il escriuoit contre moy,  
& qu'il fist imprimer son pernicieux Exa-  
men, où il assubiecit la Royauté sous  
d'autres puissances, suiuant les anciennes  
maximes de quatre-vingts neuf, qui ont  
engendré tant de malheurs à la France,  
& lesquelles i'ay tousiours combattuës com-  
me damnables & contraires à la seureté des  
Estats. Non que i'aye voulu oster les Roys  
du bercail de l'Eglise, & les rendre Pasteurs  
au lieu de brebis: mais bien ay-ie tousiours  
dit, qu'il falloit de grandes considerations  
deuant que de venir aux excommunications,  
à cause du rang qu'ils tenoient, & des con-  
sequences perilleuses qui s'en pouuoient  
ensuiure; mais que routesfois si la necessité  
force d'en venir là, que pourtant ils ne doi-  
uent pas perdre leur bien ny la fidelité &  
obeyssance de leurs subjets. Je prendray  
Monsieur Gillot pour tesmoin de ma con-  
science, que i'ay tousiours eu nette sur cette  
matiere, aussi bien que luy sur celle du Con-

cile de Trente, lequel il n'a pas eu dessein d'inualider. comme on luy a imputé : mais seulement a voulu faire voir la disposition du Siecle de son temps, qui souspiroit vne bonne reformation; & sur tout d'oster le Celibat & le Carefme, comme contraires au genre humain.

Il est tousiours luy-mesme, dit le Cardinal, diuagant & sautant d'une matiere à l'autre. Vous souuenez-vous quand vous plaidez la cause d'une femme qui auoit enléué son mary de la potence, que vostre conclusion fut contre le Cardinal du Perron, que le Concile estoit par dessus le Pape? Surquoy Seruin s'eschauffant dit : le reprendray mon discours & prouueray disertement ce que j'ay dit, & nul ne meniera qu'il n'aye signé le serment horrible qui se fit contre Henry troisieme, qu'aucuns afferment auoir fait de son propre sang, & qu'il estoit de ce conseil, duquel Monsieur de Neuers adit il y a quarante ans. † Ils se resolurent de forger vn Conseil à Paris de quelques personnes choisies à leur poste & deuotion pour ordonner & disposer des affaires du Royaume ainsi que bon leur sembleroit. Ils monstrerent dans l'establissement de cinquante quatre personnes, dont ils le composerent, qu'ils ne se soucioient d'aucune capacité, suffisance & experience en eux, pourueu qu'ils y trouuassent de la passion, de l'aueuglement, & de la temerité : tellement que les plus mutins & les plus ennemis de la Maiesié, leur furent les plus capables.

† Le 19.  
Feurier  
1589.

Aussi firent-ils à leur entree vn trait digne de notables Conseillers d'Estat, en quoy leur ignorance ne parut pas moins que leur passion, & la seruitude qu'ils auoient dénouëe à celuy qui les auoit creéz, &c.

A quoy, au lieu d'auoir esgard apres leur sottise & imaginative degradation de la personne du feu Roy, (auparauant mesme que sa sainteté y eust touché) & de proclamer promptement vn autre Roy, ou à tout le moins appeller vn Prince du Sang pour exercer ceste regence: ce beau Conseil, faict de toutes pieces, comme vne botte de foin de toutes sortes d'herbes, &c. signé de Marillac, & pour Grefrier Senault. Par ceste allegation vous voyez que ie n'ay pas tort de hayr le nom de cét homme, & quand vous entendrez ce qui suit, vous mesmes le condamnerez. Car depuis  
on ne cessa iamais de poursuiure le Pape avec mille impostures, & sur tout des rodomontades, que le Roy bestoit accablé, & que toutes les grandes Villes & les Parlements, grande partie des Officiers de la Couronne, Capitaines & Seigneurs, & entre tous le Clergé estoient vnis avec eux. Qui fut cause de le faire precipiter à publier le Monitoire contre le Roy, cuidant qu'il fust perdu, qui causa vn grand malheur. S'ils en fussent demeurez là, le mal eust esté moindre. Mais voulant esteindre toute la maison Royale, ils pousserent l'affaire tousiours avec la mesme fureur contre la personne de vostre Maiesté, & obtindrent vn Monitoire plein d'horreur, vous

a Discours  
de Mōsieur  
de Neuers.  
b Henry 3.

Le Monitoire fut  
publié le  
22. & 23.  
Iuin à Meaux, le 9.  
Iuillet à Chartres,  
& le dernier de Iuillet ceste  
furie d'Enfer partit de  
Paris pour son cruel  
parricide.



priuant de vostre Royaume de Nauarre, dignitez & charges, vous declarant indigne, inhabile, & incapable de posseder aucunes Seigneuries, & specialement le Royaume de France, & la publication en fut faite à nostre Dame, où Michel de Marillac s'y trouue encor signé, & par ceste malheureuse fulmination on vouloit estouffer dans vos reins ce grand Roy vostre fils, qui est aujourd'huy le plus renommé Prince de la tetre, par les grandes actions qu'il a faites contre tous ceux qui ont entrepris contre luy : & de plus s'ensuiuit le peril que vous courustes depuis à Paris.

Vous m'estonnez de tout ce que vous me dites, dit le Roy, ne pouuant conceuoir en mon esprit, comment cela ne s'est point sçeu plus tost, & si l'on l'a sçeu, comment on l'a tant souffert. Et le Parlement comment viuoit-il avec luy? Mal, dit le premier President Champigny. Car comme le President le Iay fut député vne fois vers la Royne, pour luy faire des remonstrances sur le Code Michéau, lequel ie diray par parenthese, que quand il fut rapporté au Palais en la presence du Roy, parlant des Estats composez (disoit-il) de l'Eglise, Iustice, Noblesse, & tiers Estat, il pensoit par ceste impertinente nouueauté de proposer quatre Corps au lieu de trois, dont les anciennes Assemblies dans le Royaume ont tousiours esté composees, & mettant la Iustice deuant la Noblesse, establir vn

ordre qui seroit comme enregistré en ceste compagnie qu'il pensoit obliger par là. Mais le fruit qu'il en tira, fut qu'on se mocqua de luy, & que s'estant eschauffé contre la harangue il disoit, Vous m'attaquez, ie vous entends bien. Il est bien aisé, dit le President, car ie parle bon François : luy voulant donner par ceste attaque sourde vne atteinte qui signifioit qu'il ne le tenoit pas pour tel.

De quel Code voulez-vous parler, dit le Roy? A-on adiousté quelques choses aux anciennes Ordonnances? Il me semble qu'elles estoient assez claires, & qu'il ne falloit que les bien observer. Qu'en dites vous, Monsieur de Sillery? Lequel respond: Sire, ie vous assure que ie n'y ay peu rien comprendre, & que luy mesme n'a pas entendu ce qu'il a voulu dire, se voyant par plusieurs articles qu'il a eu dessein de renverser tout ce qui estoit du passé, pour le reduire sous son caprice sans raison, faisant quasi par tout des ouvertures à ne l'observer point. Toutes les anciennes Ordonnances estoient pour authoriser, faire reuerer & honorer la personne du Roy, estant porté en icelles, *remettant toutes les difficultez, contrauentions & oppositions, à Nous, pour en ordonner, &c.* où celles-cy euoquent tout au Conseil pour en deliberer, & ordonner comme on verra bon estre : qui est en vn mot attirer à soy toute l'autorité, & faire vn Roy de cire, qui ne pourroit agir de pleine puissance Royale sans l'ayde de son

Sceau : qui est bien loin de la façon respectueuse, que ceux qui ont possédé nos charges ont tousiours rendu aux Roys. Monsieur de Bellievre ne vidoit pas ainsi avec vostre Maiesté.

Alors l'Euesque d'Orleans quittant son Tertullien, qui l'auoit mis tout en'eau, prit la parole & dit : Vous n'avez pas tout dit de ce beau Code, lequel non seulement estoit contre la Maiesté des Roys, mais encorés contenoit des heresies, pour lesquelles aucuns du Clergé avec moy luy declarasmes, que s'il n'y remedioit, nous l'excommunierons avec son liure : & entr'autres, nous luy monstrasmes l'article du Concile de Trente, ( lequel bien que non receu en la police, pour la foy ill'est par tout le monde ) qui deffend les mariages clandestins, luy veut que les Parlements les declarent nuls, par vne attribution de pouuoir iuger des Sacraments, & faire plus que le Concile, qui les deffend bien, mais ne les annulle pas : car *quod Deus coniunxit homo non separet*. Il demeura muet, s'excusa sur son intention, qu'il affermoit n'auoit iamais eu mauuaise, & qu'il y falloit remedier par l'examen qui en seroit fait fort promptemēt. Surquoy fut ordonné le sieur de Bullion Commissaire pour cet effect, qui n'a pas fait de difficulté d'apostiller ces beaux articles, où l'on voit qu'il prononce : Cestui-cy seta osté : cestui-là corrigé : on adiousteratels mots : on changera ceux-cy. En sorte que si on eust pronon-



prononcé sur tous , on n'en eust laissé aucun.

C'estoit sa precipitation, dit le President de Verdun , *ore obtorto*, qui luy faisoit tout entreprendre de sa teste , ne voulant rien communiquer avec personne, tant il auoit bonne opinion de luy , croyant pouuoir tout faire sans estre blasmé. Et qui ne s'estonna vn iour, le Roy allant au Parlement, de luy voir porter huit Edicts , qu'il n'eut pas le loisir d'acheuer à son logis , & les alla sceller sur l'Autel de la sainte Chapelle ; ( qui sembloit ne deuoir iamais estre purifié de telle profanation que par le feu qui y a esté mis depuis. ) Pour montrer avec combien peu de consideration il faisoit les affaires , qu'il conduisoit plustost avec impetuosité qu'avec raison. Et si ces Edicts, qui se pouuoient tous reduire en trois ou quatre , eussent esté couchez en bonne forme, le Roy en eust eu contentement, & eust empesché beaucoup de crieries. Par où l'on peut iuger de la difference de scauoir bien ou mal faire les choses. Il vouloit prendre seance par dessus moy au Parlement, quand il y viendroit seul : le l'en eusse bien empesché, comme i'ay fait voir par la fueille que i'ay fait imprimer : & quoy que Ribier puisse auoir escrit au contraire, ie me serois plustost fait tourner la bouche de l'autre costé, que de luy auoir cédé.

C'est parler en homme de cœur, dit l'Aduocat Arnaud : Mais puis que vous luy enuôlez, comment n'avez-vous point sceu les discours que nous faisoit M<sup>o</sup>sieur des Landes, de son entree au Parlement avec le Roy, pour presenter ce ridicule Code, & afin de persuader & obliger la Cour à le receuoir ? Il commença sa harangue par la maladie du Roy, les secours donnez en Ré, & la continua par la defaïcte de l'armée Angloise, du retour des deux autres armées, sans aucun effet, du siege de la Rochelle, & de la circonualation qui y fut faïcte, du siege de Tyr par Alexandre, de la puissance de la Mer qui ruina sa Digue, de l'antiquité des vaisseaux à feu mentionnez dans Quinte-Curce, pour monst<sup>r</sup>er que les Rochelois se vantoient à tort d'en estre les auteurs; de l'Ordonnance de Theodose, & Honorius touchant le Nil; du miserable estat de la Rochelle quand elle fut prise; du Traicté qu'elle auoit fait avec l'Anglois; de la ruine de Bizante par l'Empereur Seuerus, de Limoges par Charlemagne, des gardes du Roy entrées dans la Rochelle plustost comme troupes auxiliaires, que conquerantes. Ne sont-ce pas preuues pertinentes pour l'autorité de son Code ? Et recognoissant trop tard son impertinence par la mocquerie qu'il apperceut qu'on faisoit de luy, il usa de menaces

par vne infinité d'exemples hors de propos pour faire peur ; & en vn mot ; dire qu'il estoit iniuste & ridicule, non receuable que par la force. Aussi a-il esté si mal receu, que s'il y auoit Aduocat si hardy de le citer, il seroit sifflé par la Compagnie. Chacun conclud, qu'à son humeur tout sembloit possible, & qu'on ne s'en estonnoit, veu qu'il n'auoit point eu de honte de publier & aduouër la traduction, & rhimes de ses Pseaumes, qui auroient fait rougir tout autre que luy. Alors le Roy imposa silence à tous, voulant sçauoir qu'elle auoit esté l'issue de l'affaire.

Que le iour de la Saint Martin (lequel Borru nomma ingenieusement la iournée des Duppes) respond Villeroy, plusieurs croyoient que le Cardinal fust par terre; & ses ennemis s'en resioüissans, les gens de bien en souspiroient, & les Huguenots mesme se desesperoient de cét accident, parce que l'ayant trouué fidelle à leur maintenir ce que le Roy leur auoit promis, ils craignoient de retomber dans les maux dont ils venoient de sortir: Et que comme on taschoit de renuerfer l'Edit de Paix qu'il auoit conseillé, ils n'esperoient que routes sortes de miseres par son esloignement: C'est pourquoy ils s'affligeoient fort du bruit qui en courut. Et comme le lendemain on veid esclater trois grandes nouuel-



les, La cullebutte du Garde des Sceaux, L'establissement en sa place de Chasteau-neuf, & le Iay fait premier President, tout le monde changea de visage, les gays du iour precedent deuindrent melâcholiques, & les affligez recommencerent à rire.

Cela est chose ordinaire à la Cour, dit le Roy, & i'ay veu mille choses semblables; mais cependant voila vn bon choix: Et Dieu vueille que tous ceux qui se feront à l'aduenir, soient semblables: l'Estat en ira de mieux en mieux. Le President le Iay fera bien cette charge. Pour Chasteau-neuf, il est de ma nourriture. Monsieur de Ville-roy, vous sçaez que ie vous ay dit, il y a long-temps, qu'il prendroit vn iour la place de son grand pere, de son oncle & la vostre: & dès que ie l'enuoyay en Hollande, pour estre conioinct avec le President lanin dans le Traicté de la Treve qui se faisoit, i'en eus la pensee, sur ce que m'estant venu trouuer vne fois sur ce sujet, ie cognus qu'il seroit propre aux affaires; & le mesme President me l'a tousiours fort estimé. Ce n'est pas à tort, respôd ce bon Vieillard, comme il se void par les continuels emplois qu'il a eus depuis: & se peut dire, que iamais homme n'est entré en sa place, qui aye tant negocié dans les pays estranges. Et Bethlen Gabor le remarqua fort bien en son Ambassade d'Hongrie avec le Duc

d'Angoulesme. Il a esté Ambassadeur en Flandre, en Suisse, Grisons, Venise, Angleterre, Bellievre, qui brauement mit l'espée à la main dans les Grisons, contre l'Ambassadeur d'Espagne qui le vouloit preceder, & de Sillery, qui auoit aussi veu les Pais estranges, n'ont pas mal entendu leurs elzages, l'un & l'autre ayans à la verité long temps outre cela esté employez dās les plus grandes negociations du Royaume : mais tous les autres, qui ont eu credit, n'auoient iamais quitté le Palais, comme Poyet, du Prat. Pour du Bourg, il auoit aussi fort voyagé, respond le President, en riant, car il venoit de Surie quand il fut faict Chancelier. Et cē qui n'empire pas les conditions de cestui-cy, ce sont deux ou trois années qu'il a eu d'employ & de grande priuanté avec le Cardinal de Richelieu, qui luy ont appris des choses qu'on m'a dit, qu'il confesse luy mesme luy auoir donné de grandes lumieres, qui luy auoient esté incogneues iusques alors.

Tout ce que vous dictes est vray, dit Villeroi: Et l'adiousteray encor ce qu'on escrit, & que ie trouue fort à son hōneur & à celuy de son predecesseur, à sçauoir les lettres de sacharge, portans, *Que le Roy n'ayant peu auoir plus long-temps agreable les seruices du sieur de Marillac en la charge de Garde des Sceaux (noiez cela) ayant à la remplir de quelque per-*

sonnage, auquel les qualitez que requiert vn si grand office se trouuassent au degré de vertu qu'il conuient, afin que nous en ayons non seulement satisfaction, mais nos peuples aussi, & que de son equité & droicture ils puissent attendre & receuoir iustice aux plainctes qu'ils auront à nous faire, & qu'il se fust acquis vne telle experience aux affaires d'Estat, qu'en celles qui se presenteront, nous puissions estre assistez de son Conseil. Ce que n'ayant trouué en personne si eminemment, qu'en nostre tres-cher & feal, &c. lequel nourry en nostre Parlement & employé dès sa plus tendre ieunesse, dès le Regne de feu nostre tres-honoré Seigneur & Pere en diuers Ambassades, & depuis pour nous employer aux plus grandes affaires qui se sont presentees, soit dedans ou au dehors de nostre Royaume ausquelles il nous a donné des preuues de sa capacité & fidelité, s'y estant acquis le renom qui conuient à vn Garde des Sceaux, & l'experience pour dignement nous seruir, Nous n'auons peu ietter les yeux que sur luy, esperant que son soin & sa vigilance nous aidera à restablir nostre Royaume en exemple à la posterité : ce qui retournera à la gloire de celuy qui nous a tousiours couuert de ses ailles.

Voyez, dit le Roy, son oncle le Marechal de la Chastre qui pleure de ioye. Qu'on appelle le Garde des Sceaux de Moruillier, auquel ce bon homme disoit que son neveu Charles ressembleroit, afin qu'il aye sa part de la nouuelle. Pour des gens d'espee



qui entrent au Conseil, le Marechal de Schomberg en est tousiours, à ce qu'on m'a dit. C'est vn homme sage dès le berceau, & que i'ay tousiours aimé. Il y a ie ne sçay quoy d'escriit sur la face des hommes, qui fait veoir s'ils doiuent estre quelque chose ou non, & cela ie l'ay leu sur la sienne, & ie ne me suis iamais gueres trompé en mes iugemens. Et qui a les finances à ceste heure? Le Marquis d'Effiat, Sire, dit Ville-roy : & lors qu'on croyoit qu'il fut sans ressource, apres tant de despées qu'il a soustenues depuis qu'il est en charge, il a si bié pris ses mesures, qu'il a entrerenu ceste guerre & en rapporte de l'argét, sans auoir rien entrainé sur l'aduanee de l'année prochaine dans pas vne des Receptes generalles : qui fait veoir qu'on y procede fidellement. Aussi en a il receu cet honneur, que sur l'instance qu'il a fait au Roy, d'estre deschargé d'un si grand fardeau, offrant son conseil & son assistance à qui que ce fust, qui fust nommé de sa Maiesté pour en faire l'exercice; il luy a commandé expressement de continuer sa fonction, comme le iugeant si necessaire en cette administration, qu'il croyoit n'y en pouoir commettre d'autre sans vn grand interest en ses affaires : & à Vigliane, où les troupes du Duc de Sauoye furent bien frottées par des gens plus foibles qu'elles n'estoient, & encores à Carignan, où il

monstra en l'un & en l'autre, qu'il n'estoit pas moins bon pour combattre que pour le maniemment des Finances; dequoy s'est ensuiuy, que pour marque de sa vertu il a esté fait Marechal de France:

N'y a-il plus de robe longue dans les affaires, demanda le Roy? Bullion y est; SIRE, respond Villeroy, & y setnira tres-bien, car ie l'ay tousiours cogneu accort & iudicieux. A qui en parlez-vous, dit le Roy? N'est ce pas vn encor de ceux de qui ie me seruois le plus? Le President Iainin n'en sera pas marry. Non, SIRE, respondit-il, ie m'accommodoïs fort bien avec luy, & auions accoustumé de rire souuent ensemble quand nous estions de loisir, & principalement quand ie luy disois ce demy vers, *Antrum immane petit*. Ie vous entends, dit le Roy, & me faites souuenir du *Dio me ne garde de ma femme*, qui ne fut mal à propos.

Et qui a les despêches estrangeres? Bou-teiller, SIRE, dit Villeroy, & les fera bien; car il a bon sens, fidelité & secret; & de plus dresse de la main du Cardinal, qui ne luy aura pas esté vne mauuaise leçon. Il est fils, dit le Roy, d'un homme de bien, que i'ay cogneu sincere, & en voulois faire vn President si i'eusse vescu dauanrage. Cela me fait bien esperer de mon fils, de ce qu'il ne prend pas le conseil de Roboan, qui chassa tous ceux que son pere aymoit, pour se ieter entre

ter entre les mains de gens nouveaux & inexperiencez, qui le perdrirēt. Il paroist par là que ie ne faisois pas mal, puis qu'on suit mes erres, & qu'on prend tous ceux desquels ie me suis seruy, ou que i'ay aymez pour la conduite des affaires.

Mais ne dit-on rien dans ces depesches du frere de Marillac? Ouy, SIRE, dit Ville-roy, l'histoire en est longue, & tout le monde le blasme de son ingratitude. Car vostre Maïesté sçait bien qu'elle n'en auoit iamais fait d'estat depuis le fait de Caboche, & qu'une fois disnant chez Bastien, disant à tout plein de Seigneurs, Dissons mes enfans, mettez vous à table avec moy, il s'y voulut mettre avec les autres; & vous le fistes leuer, disant que par vos enfans vous n'entendiez pas ceux de la sorte: & le chassastes du Bac à Saint Germain, disant, que vous ne vouliez point dans vostre Compagnie de gens qui luy ressemblassent; pour faire voir que vous ne l'estimiez pas: & a vescu ainsi iusques à ce que le Cardinal de Richelieu luy procura la charge d'Ayde de Camp dans les armées contre les Princes, & puis la charge de Commissaire General de l'armée, en suite la Lieutenance de la Compagnie des Gendarmes de la Roïne Mere, avec la recompense. Au siege de S. Iean il fut fait par son intercession Marechal de Camp, & luy fit donner le Gouver-



nement de Verdun , la Lieutenance dans le Pays , & les moyens de faire bastir vne des plus belles Citadelles qui soit en France. Et pour conclusion fut fait Marechal de France à Priuas avec des peines indicibles, le Roy vostre fils y contredisant , se fâchant de refuser le Cardinal qui l'en sollicitoit, & neantmoins apres l'auoir promis, il fut deux heures sans s'y pouuoir resoudre: Et comme il eust fait le serment deux iours apres, ayant sujet d'escrire au Cardinal, il le traita simplement *de vostre bien-humble seruiteur* : pour monstrier que les honneurs bien meritez auoient en vn instant changé ses coustumes. Apres il fut Lieutenant General d'armee seul en Champagne, où il n'a pas mal fait ses affaires , à ce qu'on dit, & pour recompense de ce que dessus, luy & son frere ont voulu ruiner l'auteur de leur bonne fortune, comme il ne peut s'empescher de le tesmoigner partant de Verdun, disant : Il y a long-temps que mon frere & moy luittons contre le Cardinal, mais i'espere qu'à ce coup nous le porterons par terre, & son frere a esté veu sombre & morne dans tous les bons progres d'Italie, comme ces Medecins , quand ils ont iugé quelqu'un à la mort , pour la reputation se desesperent s'il guarit. Et fut remarqué par plusieurs personnes vne ioye incroyable, quand il sceut dans le Sceau, la prise de

Mantouïe, qui luy remplit le visage de gayeté lumineuse, & avec vn *Nous en verrons bien d'autres. Et si on m'enst creu !* Il appella tous les Secretaires qui auoient des lettres rebutees, & les fit apporter, & les scella toutes, pour par ce moyen faire les feux de ioye d'une si bonne nouuelle, estant de ceste humeur, de vouloir auoir vne iustice & & vne raison à sa mode : car ce qu'il faisoit n'estoit pas parce qu'il sembloit ainsi aux autres : mais parce qu'il estoit porté à cela par sa fantasie, n'ayant iamais esté de l'opinion de la compagnie, mais voulut tousiours que tout le monde fust de la sienne, au surplus deuenü si fier, qu'il sembloit que comme vn Lyon il deust deuorer tout le monde, offensant vn chacun doublement du refus & de la maniere qu'il y apportoit, montrant bien qu'il auoit mal estudié la Pratique de Messieurs de Chiuerny & de Sillery, qui adoucissoient les mescontentemens de ceux qui perdoient leurs causes, par des paroles douces & ciuiles, qui empeschoient le desespoir, que donnoit cestui-cy, deuenü inaccessible à tous ceux du Conseil mesme, se tenant souuent renfermé, escriuant tousiours de mauuaises memoires, & faisant des liures, qui reussissoient si mal, que Toirax en fit pendre vn publiquement & brusler apres pour la fausse monnoye qui estoit contenuë de-

dans : & ce qui estoit de pire , c'est qu'il ne  
 rendoit point iustice , estant perpetuelle-  
 ment dans les cabinets de la Royne , où il  
 auoit ceste ruse d'entrer de bon matin , pour  
 faire veoir qu'il auoit grand credit : & com-  
 me on le voulut descouurir , on trouuoit  
 qu'il entretenoit deux ou trois heures les  
 femmes de chambre : & puis quand on  
 l'appelloit , il se trouuoit qu'il n'auoit rien  
 à dire , qui en vn autre temps l'eut fait trou-  
 uer importun & fascheux , ne laissant pas  
 de continuer pour payer le monde de ce lu-  
 stre , qu'il manioit le cabinet à sa mode , fai-  
 sant plus d'estat d'un garçon de chiens que  
 d'un Maistre des Requestes : & cependant  
 qu'ils s'amusoit à ces bagatelles , les pauures  
 parties languissoient , le maudissant de ne  
 pouuoir estre expediees , & demeurer rui-  
 nees en la poursuite de leurs affaires : Et  
 cela n'est rien au prix de son proceder ,  
 quand le Roy s'en alla à S. Iean de Morien-  
 ne , dissuadant tous ceux qu'il rencontroit  
 de le suiure , luy qui s'exposoit en toutes  
 sortes d'incommoditez , pour resmoigner  
 qu'il n'y a rien de plus cher que l'honneur  
 de son Estat : & cét homme avec vne ren-  
 dresse de crocodile , protestoit publique-  
 ment cõtre ce conseil , duquel il sommoit  
 vn chacun de se souuenir qu'il ne l'auoit  
 point donné , augurant toutes sortes de  
 mauuais presages pour en descourager



tout le monde : & au retour il se mit à genoux deuant le Roy , tesmoignant avec vn visage fumant de zele , le contentement qu'il auoit de le voir eschappé d'un lieu où il luy pouuoit arriuer toutes sortes de desastres , & avec ceste ioye spirituelle on remarqua, qu'en la maladie du Roy, où tout le monde fondoit en larmes , il n'en versa iamais vne seule.

Fiez-vous en ces hypocrites, dit le President Ianin. Par le Corbieu ie les ay tousiours haïs. N'en parlons plus, dit le Roy , ie veux sçauoir des nouuelles d'Italie : Ie vois le Strigio , qui nous en dira. Et bien Marquis, vous auez perdu Mantoüe ? comment cela est-il arriué ? SIRE, respondit le Marquis, *Sic erat in satis*: car avec tant soit peu de resolution on pouuoit éuiter ce malheur. Mais comme le Duc auoit naturellement le don d'incertitude au choix des choses qui luy estoient necessaires , il m'a rendu Prophete à mon tres-grand regret, luy ayant plusieurs fois dit, qu'il valoit mieux auoir vn Estat gasté que perdu, qu'il falloit quitter toute conuiuence pour aller au solide & au certain, ou autrement qu'il se verroit bien tost despoüillé de ses Estats. Ses peuples luy estoient mal affectionnez, & il pensoit avec le temps les gagner, & en les espargnant il s'est perdu avec eux. S'il eust sceu se seruir des biens qui estoient

dans sa ville, leuer des hommes, faire venir des François de l'armée Venitienne, qu'il craignoit & apprehendoit plus que les Allemans pour son malheur, il auroit esuité beaucoup de maux, & avec cent mille escus qu'il pouuoit prendre sur les siens avec raison, il auroit esuité (chose prodigieuse) vn sac de cinq millions d'or, & la ruine entiere de tout son peuple avec la sienne, causée par ces furieux animaux qui ont figure d'hommes, mais tout à fait bestiaux, ayans foulé aux pieds la Religion & tout ce qu'il y a de plus sacré, pour le prostituer à leurs furieux appetits : qui a fait voir le zele de ceux qui les ont enuoyez tous heretiques, afin de rendre leur crime plus grand deuant Dieu, qui tost ou tard leur demandera compte de tant de desordres, dont ils sont les auteurs, comme du sang d'un million de Vierges violees & égorgées, avec vne barbarie sans exemple.

Et les Princes d'Italie qu'ont-ils dit à cela? dit le Roy. Rien, SIRE, respondit-il. Car Florence est tout Espagnol, tant que la Mere & le Comte d'Orse viuront : apres, ie n'en respondrois pas, si on garde vne entree en Italie, car ie sçay qu'il aime fort vostre fils. Pour Parme, c'est vn ieune homme qui n'oseroit respirer iusques à ce qu'il voye que les François ayent les Alpes derriere eux : en ce cas là, il n'est pas hors d'esperan-

ce de pouuoir estre aussi bon François que le Duc de Castres, de sa Maison, l'a esté pour vn temps.

Et les Venitiens, dit le Roy: Ils ont voulu hors de temps exercer leur prudéce, respôd le Marquis. Car pour ne se vouloir pas declarer comme ils deuoient, voyant les François en Italie, autant pour leur liberté que pour celle des autres, ils ont laissé perdre Mantouïe, pouuant quatre mois auparauât chasser les Allemans d'Italie, qui ont esté long-temps foibles: & comme ils ont voulu temporiser, ils ont auancé leur ruine: car s'estans depuis fortifiez de nouvelles troupes, ils furent faire vne furieuse attaque à Maringo & Villebonne, où les bons Seigneurs ne se trouuans pas respectez comme à Venise, ils furent contrains de faire retraite en telle sorte, que qui n'eust sçeu ce qu'ils faisoient, certes on eust dit qu'ils eussent fuy: & le malheur fut, que deux mille cheuaux qu'ils auoient voyans venir en ordre les Allemans, qui n'estoient que mille, poursuiuans leur victoire, ne s'aiferent iamais de les charger, pour n'auoir pas eu, disoient-ils, le commandement, lequel ils allerét chercher à route bride à Valaize: où ayans assemblé leur conseil, ils suivirent l'aduis du Comte Scor, lequel, disoit-il, *Soben che sacra vituperoso ma pure fara vtile à la Serenissima Republica*: lequel



fut de quitter la place, & à sauue qui peut, gagner Pesquiere. Ce qui fut brauement executé ; en attendant avec impatience les diuertissemens du Turc en Hongrie, pour occuper les Allemans, & diuertir ces desseins d'hommes bestiaux, qui ne laissent nulle meschanceté à commettre.

Mon fils a pris bon conseil dans la resolution qu'il a faite, dit le Roy : car ven ce que j'entends dire, Casal estoit pris avec Mantoue, & les Grisons. Et cela estoit le chemin, à quoy les Espagnols tendent, il y a long-temps, d'vnir l'Allemagne à l'Italie ; auquel cas tous les autres Princes estoient en grand hazard : & m'estonne que pour s'y opposer toute la terre ne s'vnit avec mon fils, qui a eu de grandes raisons d'entendre cette guerre, avec laquelle il a cogneu & preuenu le mal ; & sans laquelle les Venitiens eurent couru grande fortune ( s'ils n'eussent point eu d'amis armez ) d'estre reduits à la pitoyable harangue qu'ils firent à Maximilian : N'y ayant point de doute qu'ils pouuoient estre despoüillez de toutes leurs places en terre ferme : & leur grâde ville, priuée du pain qu'ils en reçoient, eust bien tost suiuy le chemin des autres.

Qu'est deuenu ce braue General qui les a si bien seruis, & comment s'appelle-il ? Sacerdi, respond le Marquis, qui a esté demis de sa charge & emprisonné.

Le Roy

Le Roy soupirant du peu de preuoyance qu'auoient eu les Italiens, pour s'opposer aux maux qui les approchoient de si près, voulut sçauoir ce qui auoit reüssi du Traicté de Ratisbonne. A quoy Villeroy respondit, que plusieurs l'auoient trouué mauuais, pour le zele qu'ils auoient à la grandeur de l'Estat, & les autres, pour n'aymer pas la paix au dehors, encores qu'ils eussent publié auparavant, qu'ils en brusloient d'enuie. Et ayant veu, n'y a pas long-temps le Duc de Monteleón souz vn Cyprez tout pensif, il seroit bon de le faire approcher, car il est homme candide, qui dira franchement ce qu'il en peut auoir appris, n'estant pas chose bien expliquée dans les depesches que i'ay.

Alors ce Duc estant appelé, & enquis de ce qu'il en sçauoit; il tesmoigna que d'entrer en ces discours cela luy estoit douloureux, par vn profond soupir & vne grande melancholie qui luy en parut sur son visage, & refrognant ses sourcils dit au Roy: *SIR E, Infandum iubes renouare dolorem.* Je me ressouuiens que du temps que i'estois en France, ie fus vn iour visiter le sieur Arnaud, ce fameux Aduocat, pour conferer avec luy sur les oppositions de Bourdillon en Piedmont, & les remonstrances du Duc de Neuers, pour sçauoir s'il auoit trouué assez de vigueur en l'vn, & de raison en l'autre. Je vis sur sa cheminee ce Distique,

*Versus lugebit Iberia fatis.*

Mis à l'imitation de Virgile ; par lequel ce Poëte celebre representoit vn Prince de la race de Priam , qui par vn don de Prophetie , ou plustost par vne profonde science d'Estat cognoissoit l'instabilité des choses humaines , consoloit Enee , en predisant , que les destinees de la Grece , ennemie des Troyens , seroient en fin changees , & qu'on verroit vn iour le chastiment merité , qui se feroit par quelqu'un de sa posterité. Surquoy dès lors il me tomba dans l'esprit , que voyant tant de vertus en vostre fils dès sa ieunesse , il pourroit accomplir ce prognostic ; & que depuis il s'estoit tousiours enquis du cours de sa vie pour verifier sa creance : Et qu'ayant entrerenu Collalto de ce qui se disoit ( quand il quitta la vie ) de ce Traicté , dequoy il sembloit que quelques-vns des leur en auoient de la ioye , & autres s'en attristoient ; ie le priay instamment , comme bien informé qu'il pouuoit estre , de m'en dire son sentiment. A quoy il me respondit d'Italien à Italien , comme conuenans d'inclination , de preferer sagement la conseruation de la vie à la vanité : Qu'il estoit vray , que depuis la prise de Mantoüe ( qui l'auoit chargé de despoüilles ) ayant ressenty que ses poulmons se remplissoient tous les iours d'une defluxion , qui le faisoient iuger qu'il estoit près de la mort , il auoit pensé de faire vne honneste & seure retraicte , pour s'oster de la foule , & des combats importuns



à son humeur : qui l'auoit porté plusieurs fois à supplier l'Empereur de luy donner congé : Et que si d'aduenture le dessein qu'il auoit n'eust esté cogneu de tout le monde, & que la maladie ne l'eust si fort pressé, il eust creu ne pouuoir, sans regret, voir que les François firent la paix les armes à la main, si celle de Rarisbonne ne les eust mis hors de peine de consulter, s'il estoit plus aduantageux de s'exposer au peril d'une bataille, que de laisser la campagne libre à leurs ennemis, qui s'approcherent si près des retranchemens, que les Espagnols ne refuserent pas tant d'entreprendre de les en esloigner pour la crainte de la mort, ( car il n'y a point de doute qu'ils ne soient fort vaillans ) que pour le desplaisir qu'ils eussent peu receuoir, en se retirant vn peu viste, de faire tort à leur grauité. Et quât à luy, qui regardoit plus le solide que l'apparence & le fast des demarches des gens de guerre, il disoit sincerement ; que puis que l'Empereur, faisant la paix sans attendre la responce d'Espagne, a tesmoigné qu'il vouloit preferer les interests qu'il a dás l'Allemagne pour la Religio & l'Estat, aux entreprises peu heuruses des Gouverneurs de Milan, il est croyable, que cette Monarchie affectee par les Espagnols sur les autres peuples, sera bornée au Fort de Fuentes, & que par le secours de Casal, ils doiuent auoir perdu l'esperance d'Italie, dont ils pensoient, suiuant l'exemple

des Romains, estendre leurs limites au delà de la ligne qu'ils ont designée pour les côquestes de la terre, comme pour celles de la mer.

Dans ces discours de Collalto i'apperceus bien qu'il estoit tout chagrin, d'auoir si peu iouy du frui&t de sa proye. Et comme il m'eut laissé, ie rencontray Villani, qui me donna vne grande relation de tout ce qui estoit sur le tapis au temps de son partement, enuoyée, à mon aduis, par quelqu'un del'autre monde, tres-bon Italien, mauuais Espagnol, & qui ne hait pas les François. Je ne liray seulement que ce qui regarde ce dont vostre Majesté a voulu estre informée, qui est contenu en cet article.

Et quant au Traicté qui s'est fait en Allemagne, il me semble que c'est le prelude de la Comedie qui s'est iouïée deuant Casal, laquelle est vne des rares pieces qui aye paru dans tous les siècles passez; estant chose assez plaisante & peu commune de voir Mazarini sortir d'une trenchée à l'improuiste le chapeau à la main, & porter à toute bride la paix aux François, qui venoient pour enfoncer le Camp tout en la mesme sorte, comme s'ils eussent couru au faquin: & de voir en suite les Chefs de l'armée Imperiale, & Espagnolles' aduancer au grand pashors de leur Camp, pour embrasser avec ioyè les chefs François: & témoigner leur zele Catholique, d'espargner le sang des Chrestiens. Je sçay de bon lieu, qu'en

la Diette plusieurs personnages diuers estoient montez sur le Theatre pour commencer le jeu, & preparer l'attention des spectateurs : d'une part l'Empereur auoit protesté sans feintise sa bonne intention pour le repos public : & contraignant son naturel, auoit rabroüé en en colere l'Ambassadeur d'Espagne, qui vouloit qu'on ne conclud chose quelconque, & que tout l'Vniuers demeurast en suspens pour attendre le retour de son courier qui n'auoit ordre de partir qu'apres la prise tant desirée de Casal : comme si le premier mobile deuoit arrester son cours, & n'auoit point de mouuement sans les influences du Conseil de Madrid. D'ailleurs, les Electeurs Catholiques estoient sur le point de passer pour fauteurs d'heresie, au iugement des Espagnols, parce qu'ils ne vouloient pas estre despoüillez par eux comme le Palatin : qu'ils sont prests toutesfois de releuer du ban de l'Empire, voire mesme de le canoniser, pourueu qu'il le laisse iouyr de ses biens, & que comme vn bon Chanoine, il se contente d'une pension reguliere, & feroiét bien la mesme grace aux autres Princes, s'ils vouloiét estre aussi simples & gens de bien que le Duc de Pommeranie, qui en beuuât laissa prédre son Estat au Walestin General de l'armee Imperiale, & qu'ils abolissent la ligue Catholique, indigne de ce beau tiltre, puis qu'elle n'est qu'Allemande & non pas Espagnolle. Il est arriué pourtāt



que le contrecoup de tant de desseins est tombé sur le pauvre Walestin, lequel s'estant aduancé à Meningenhen, pour tourner teste vers l'Italie & la France, qu'il menaçoit de courir de gens de guerre, s'est trouué dans vne machine desmis de sa generalité, & s'en est retourné en Boheme pour contempler la vanité du monde, & de mediter de plus près, & au propre lieu, d'où le Palatin fut chassé en vn iour, que comme luy il auoit perdu en vne heure par ce banissement la possession qu'il auoit prise de la Duché de Mechelbourg. L'Ambassadeur de France changea souuér de contenâce: car au cōmencement il fit voir que le Roy sō Maistre ne s'estoit iamais esloigné d'vne Paix raisonnable, pour iustifier ses actions & son procedé. Mais cōme il recogneur que les Espagnols traïsnoient les affaires en longueur, pour l'esperance qu'ils auoient de prédre Casal, trauaillez de plusieurs incōmoditez, il tesmoigna publiquement, que s'ils ne se contentoient des conditions, desquelles on auoit parlé de part & d'autre en Italie, sans rien conclurre par leurs tergiversations & incertitudes, qu'il estoit resolu de s'en retourner: & se preparant pour cét effect, tous les gens de bien l'arrestèrent, l'Empereur mesme, les Electeurs & le Nunce, le coniuant de considerer ensemble les moyens plus propres d'appaiser le cours de ceste longue guerre: que le sang respandu dans vne bataille

auroit dauantage allumee comme l'huyle iet-  
tée sur les charbós accroist de beaucoup leur  
ardeur.

Surquoy il se rencontra , que comme sou-  
uent l'Espagne se sert de Religieux , il s'en  
trouua vn François , qui selon sa condition  
prit le party de la Paix, estant mestier de Moi-  
ne:& telles gens n'ayant rien à perdre, s'ils ont  
quelque talent de bonne intention & d'expé-  
rience , ils hazardent quelquesfois des con-  
seils que d'autres n'oseroient tenter , comme  
a fait cestui-cy , qui sous son long chapperon  
& sa grosse corde a donné le Moyne aux Es-  
pagnols en ceste affaire, où il se trouue que le  
Roy de France a secouru Casal par force &  
sans peril , son armee n'ayant pas moins de  
gloire par l'approche qu'elle a fait de ses en-  
nemis , que si elle eust gaigné la bataille. Et  
que les Ducs de Sauoye & de Mantouë peu-  
uent esperer rentrer dans leur bien. Mais  
comme le Roy Tres-Chrestien a rehaussé  
d'une main son allié , & avec luy tous les amis  
de sa Couronne: de l'autre, il a tellement abaissé  
les Espagnols , qu'il semble les auoir con-  
duits sur vn penchant, & estre en son pouuoir  
de les faire tourner au bas de la rouë de la for-  
tune: estant au iourd'huy en estat d'estre l'arbi-  
tre des differents de la Chrestienté, pour l'in-  
terest qu'ont tous les Princes de s'appuyer du  
costé où l'on voit regner la Iustice & la sincé-  
re protection des opprimez , pour se garantir

des violences & des usurpations, dont à mon grand regret, chacun se plaint, & que ie suis contrainct d'aduouier par la force de la verité: ayant de nouveau sur le cœur le desplaisir, de voir que dans l'Italie il n'y a point de borne à l'ambition des Espagnols, qui depuis six mois ont obtenu de l'Empereur, que les vrais heritiers de Piombin, place importante, pour le voysinage de la mer, en fussent entierement priuez, pour en inuestir le Roy d'Espagne, comme d'un fief del'Empire: à la charge de le remettre par infeodation subalterne & dependante du Roy Catholique, à celuy qui luy semblera estre le plus legitime successeur: c'est à dire, à celuy qui luy sera le plus affidé partisan. Ains sans les François, le Duc de Mantouë, & les autres Princes d'Italie, se fussent contentez peut-estre, de ce qu'on m'appelle maintenant entre les Sages vne Piombimade, qui est vn droit nouveau, pour offer les Estats à vn Prince en faueur d'Espagne, à la charge d'en dire grand mercy, pourueu qu'ils leur en redent vne partie, selon la courtoisie que l'on fait aux passans que l'on volle dans vne forest, de leur donner dequoy payer, à la premiere hostellerie.

Ie suis asseuré, dit le Roy, que ce n'est pas Ekemberg qui a fait ceste relation, car il est trop Espagnol. Non, Sire, dit le Duc, il ne l'est pas naturellement, mais par accident: car il est tellement hay par tout l'Empire, que s'il

n'auoit



n'auoit cet appuy il seroit perdu : & ainsi il faut qu'il finisse en cet estat, par ce qu'il n'a point d'autre remede qui luy puisse soulager les eternelles gouttes qui le tiennent attaché dans vn liç; faisant les affaires avec grande adresse & esprit, ayant peu de pareils au monde : mais il est si caché & couuert, qu'il est mal aisé de pener son intention, ayant continues douceurs & belles paroles à la bouche; mais au reste si obscur, qu'il faut vne bonne lanterne pour voir ce qu'il veut & ce qu'il pense. Il est Italien couuert de nature, & y ayant adjousté l'art il s'y est tellement habitué, que ie crois qu'en ces prieres mesmes Dieu seul peut entendre ce qu'il veut dire.

L'ay pris grand plaisir de vous ouyr, dit le Roy, mais encores ne suis- ie pas content: car comme ie vous tiens pour bon Italien ( & en disant cela ie dis beaucoup ) ie veux scauoir de vous vostre sentiment de la France. **SIR B,** respondit-il, ie scay qu'Antonio Perez a dict autresfois à vostre Majesté, qu'il estoit certain que les François n'auoient point de pareils en courage; mais que si on y pouuoit adiouster trois choses, *Roma, la Mer, yel conseio*, ils seroient pour conquerir toute la tetre. Pour le Pape, entendu sous le nom de Rome, il s'est porté en sorte, que les deux partis s'en peuuent loier: Pour la mer, la dispute qui est de long temps entre le Duc de Guise, & le General des Galeres; empesche que le Roy vostre fils ne

soit assez puissant de ce costé-là, pour tenir le costé de Gennes en sujction, & rendre difficile les communications d'Espagne en Italie. Ce qui est vn extrême prejudice à la France, pour agir en cet endroit, comme il seroit tres aduantageux, si on le faisoit, & si on y pouvoit mettre vn aussi bon ordre, que le Cardinal de Richelieu a fait en la mer de Ponant, le Roy vostre fils seroit trembler tout le monde.

Pour ce qui est du Conseil, si le lieu où ie suis ne m'empeschoit de croire les fables des Anciens; ie n'estimerois pas seulement que l'Ame du Cardinal Ximenes, fondateur de la puissance d'Espagne, fust entree dans le corps du Cardinal de Richelieu; mais ie croirois aussi qu'au contraire, ainsi que le Gerion des Poëtes auoit vne ame dans trois corps, qu'en celuy de ce Prelat François les esprits de ces trois Cardinaux Alborno, Mendoza & Ximenes, y seroient diuinement infus; tant on voit reluire en ses actions tous les plus rares traits de prudence & de sage gouuernement, qui a bien paru, en ce qu'il a tousiours conjoint la negociation avec la guerre, l'vne desquelles nuit à l'autre, pour ceux qui ne scauent pas s'en ayder avec vne egale adresse. Ne s'estant point veu, que pour auoir recherché les moyens raisonnables de Paix, cela luy aye fait relascher en sorte quelconque le soin de maintenir les armées en bon estat: & de surmonter toutes les difficultez de la peste, des

faisons, de la situation des lieux, de l'incommodité des viures, comme Collalto me l'a raconté, qu'il a veu à ses despens & avec admiration : m'ayant confessé ingenuement, que sans les diuers artifices, dont ils vsoient tous de leur costé, souz pretexte de limitations & reuocations de pouuoirs, & autres tels ambages, le Cardinal pressoit les affaires avec telle vigueur, lumiere & sincerité, qu'en peu de temps elles eussent esté terminees, si l'on eust autant cherché le repos de la Chrestienté, & celui del'Italie, qu'un peu de sumee, qui a fait pleurer Spinola en mourant, tant elle luy donna dans les yeux.

Je ne m'ennuyerois iamais d'oïr parler le Duc de Monteleon, qui a conserué tousiours l'affection de ses ancestres à la Couronne de France, dit le Roy. Mais d'où vient cette melancholie que vous auez eüe en m'abordant ? Des pensees fascheuses que j'auois de l'Italie, respondit le Duc, d'où ie ne puis iamais parler, que ie ne sois remply de douleur, veu le miserable estat où ie l'ay veüe reduite sur l'approche des deux armées deuant Cazalou, comme Lisander disoit dans son repas deuant le combat, *Faisons bonne chere à cette heure, car nous souperons peut estre tous en Enfer* : Ainsi pouuoient-ils dire deuant la bataille, dont le gain de quelque costé qu'il eust esté, eust changé entierement la face de ces Pays-là : mais bien plus, si la victoire eust esté du costé des Espa-



gnols. Car il falloit s'asseurer lors, qu'il n'y auroit plus de Princes en Italie, autre que le Conquerant, qui en eust changé l'autorité, les loix, & les mœurs. Et cela n'entre iamais en mon esprit, que ie ne l'aye saisi d'horreur: & c'est ce qui m'a donné ceste mauuaise grace que i'aye eue en arriuant.

Après cela, le Roy voulut estre informé par Villeroy, de l'Estat d'Angleterre & de la Hollâde, qui luy dit, que les affaires n'alloient pas avec la vigueur, comme du temps que le gouvernement estoit entre les mains d'une femme, qui se monstra si amie de la France, & ennemie de l'Espagne, qu'elle ne voulut iamais se separer de l'un, ny faire la paix avec l'autre. Auiourd'huy il semble que ceux-cy ne sçauent faire la paix ny la guerre: ils attaquerent la France sans sujet, & mal leur en prit: aussi de mesme, firêt-ils la paix sans raison, au temps qu'ils l'a conclurent: qui ne laissent d'en faire esperer de bons effets maintenant, s'ils sçauent bien se servir du temps: Mais ils ont joint de grands obstacles, par le Traicté qu'ils ont fait, duquel ils ne reçoient aucun fruit que des paroles, & hazardēt beaucoup, en accordant l'entrée libre de leurs Ports, à certain nombre de Vaisseaux Espagnols, qui est, comme s'ils recueilloient dans leur sein, durant les rigueurs de l'huyet, des viperes, qui estans reschaufez, sans auoir esgard à la courtoisie, ne laisseroient de faire ce qui est de leur

naturel. Ainsi deuoient-ils apprehēder l'ap-  
proche de ces gens là parmy eux, parce qu'e-  
stans perpetuellement dans les menées, ils en-  
flammeront avec mille artifices, les haines de  
la Religion dans les Prouinces : & ceux qui  
sont violentez dans leurs consciences, s'es-  
ueilleront & chercheront les moyens de se-  
cōier le ioug, & de porter la confusion par  
tout : Non pas pour le soustien de la Religio,  
car les Espagnols seroient bien marris, que  
ces pays-là fussent conuertis, pource qu'ils  
perdroient le pretexte de les empieter com-  
me heretiques, ce qu'ils feront toutes les fois  
qu'ils pourront, parce qu'ils ne manqueront  
iamais de rompre la Paix quand ils auront oc-  
casion commode de faire la guerre.

Pour les Hollandois, on dit bien que le  
Prince d'Orange est d'un naturel mol, qui ay-  
me le repos, & qui voudroit iouyr sans plus  
de travail du fruiet de ses victoires passees ; se  
plaisant dans la douceur de cette bonne re-  
nommée qui le rend tres-glorieux. Toutes-  
fois comme il est accort, & ceux qui gouver-  
nent, sages ; ils iugent bien, que la demande  
que les Espagnols font de la paix, est plus par  
impuissance que par bonté : parce qu'estans  
occupez en tant de guerres, les forces leur  
manquent pour les Pays-bas, & pour la de-  
fence de leurs Indes, dans lesquelles, si on  
continuē de faire la guerre, c'est ruyner l'Espa-  
gne, luy coupant les nerfs par lesquels sa gran-

deur subsiste, & toutes les autres puissances languissent, & en fin perissent. Ils se souviennent que la dernière Treve qu'ils ont faite, a esté la ruine de tous leurs Alliez en Allemagne, ayant donné moyen à l'Empereur, n'estant occupé ailleurs, de leur courre sus, & de les enuahir : & si on la refaisoit à cette heure, ce seroit luy faciliter l'acheuement de ce qui reste : parce qu'on y employeroit l'argent d'Espagne qui se despense en Flandres.

Ainsi ils ont bien plus d'aduanrage en la guerre qu'en la paix : estans bien asseurez, que l'Empereur n'ayant point l'argent d'Espagne ne remuera rien : Pour ne vouloir pas consumer son bien, qu'il aymera mieux conseruer à ses enfans, que de l'employer pour l'aduanrage des autres.

Comme le Roy estoit attêrifié à ces discours, il apperceut de loing Bonneuil, qui venoit courant, pour arriuer à luy; & avec vne ioye extreme il s'escria, Voicy Bonneuil : Nous sçaurons des nouuelles fraisches : & lors il commença de l'embrasser, & luy demander s'il y auoit long-temps qu'il estoit parry. Fort peu, **SIR**, dit-il en riant : car de la Comedie où i'estois Mardy en fort bonne santé, ie n'ay mis que cinq iours à venir icy. Et bien, dit le Roy, en quel estat auez vous laissé la Cour : Alors Bonneuil regardant deux ou trois fois autour de luy, & derriere, respondit, Je supplie tres-humblement vostre



Majesté qu'elle me pardonne si ie ne parle haut : car i'ay esté tant de fois broüillé, que tout me fait peur en ce lieu où ie suis nouveau venu : & aussi que les personnes de qui i'aurois à parler sont si puissantes, que ie ne me puis fier qu'en vous pour en ouvrir la bouche.

Alors le Roy licentiant la compagnie iusques au lendemain, prend Bonneuil par la main & l'emmene dans vne grande allée couverte, sans qu'on aye encore peu rien apprendre de la matiere de laquelle il l'entretenoit.

F I N.

Geo. 527.

Mer. 12. IV. 90.